

# *NJILA WÀ NZAMBI*

## *MULONGOLOLA BWÀ DITÙKÙ EDI*

 . . . katancì kakesè cyanàànà patùdì twinyika mitù yètù apa.

Taatu wetù wa mu Dyulu, tudi tuKwela twasàkidila bwà Yesù Kilistò, bwà milayi Yendè minènè yìdì Ye mutùpèshe. Tudi tuKwela twasàkidila bwà bintu byônsò ebi. Tudi ne myoyi yizùka bikolè kaaba aka mu cimenga eci munkaci mwà beena Kilistò balenga aba. Tudi tutèkemena bwà kuMumònà ùkwàta mudimu munkaci mwètù mwikàle üleeja bwikadi Bwèndè, üpèësha bantu diatabuuja, ùbàsonola bwà kwitabuujabò. Ki kiipacìlà kèètù kàà kwikalà kaaba aka, Taatu. Tudi bamanyè ne tudi mwà kuKweyemena. Katwàkwediibwa mâyì ku makàsà to. Bwalu tudi tulòmba nùnku mu Dînà Dyèndè. Amen.

Nudi mwà kusòmباayi.

Mvwa ne disànka dyàbûngì mu dìndà emu bwà kudyà didyà dyà dìndà edi ne kasùmbù aka kakesè kàà bambi mu cimenga emu. Ne pa nànku tudi . . . Ngeela meeji ne bâ—bânà bètù mbacìkwàte pa mikàbà yà mèyi bwà muntu yêyè naaci dijinga. Cikondo cyà dikèmà cyà bwobùmwè citùdì bapetè's wè. Nènku mpindyewu, dilòòlò edi ndilòòlò dyètù dìbììdì, twenda tudìlongolola mu njila. Pa nànku mpindyewu, tudi tutèkemena ne Mukalenge neàtambe kunùbènèshà bônsò byà biyiila ne panshì.

Ngeela meeji ne ndi munkaci mwà kutàngila mulundà wanyì mwímpè, Màndàmù Upshaw, musòmbe mwab'ewu, Mwanèètù wa bakàjì Upshaw. Mukalenge akubènèshè. Ndi mvùluka Mwanèètù wa balùme Willie Upshaw. Mwà mupetè mukàndà wà kudi mwanèètù wa bakàjì awu dínga ditükù ne fôtô wa Mwanèètù Willie, Congressiste. Nànku, yêyè—yêyè ûvwà mucìbükile pânsdì munda mwà bidimu bitwè ku makùmi àsambòmbò ne bisambòmbò.

Ûvwa mu disangisha dilòòlò kampànda, mêmè kumumònà mu cikèènà-kumònà, musòmbe, úpicila mu batèèleji, ne nkooci wendè pambidi, mwinàme pânsdì. Ûvwa mu dìkalù dyà balèmà ne mabayà à balèmà, bu munùvwà nwénù bônsò bamumanyè amu, ki Mukalenge Yesù kumusàngàja Yè dilòòlò dimwèdimwè adi. Nènku ûvwa ne diatabuuja too ne mwàkafwàyè.

Tudi tudyùmvwa bapèèbwé bunèème, dilòòlò edi, mùdì mukàmbà wendè musòmbe kaaba aka. Ûvwa ne bidimu bûngì munyì pààkayàye bwà kamònangana ne Mukalenge? Ûvwa ne bidimu bìngà? [Mwanèètù wa bakàjì Upshaw ùdi

wàndamuna—Muf.] Mushààle ne mwoyi too ne ku bidimu makùmì mwandamukùlù ne bìsambòmbò. [Mwanèètù wa bakàjì Upshaw ùdi ùfila bujaadiki bwà lufù lwèndè.] Mmuyè mu Dyulu bwà kiikala ne... Tudi ne kusàkidila bwà bantu banène, balwanganyi banènè bàà mvità yà diitabuuja.

Mpindyewu, dilòòlò edi, bìdi ne, katwèna baswè kunùlama ntàntà mule to. Tuvwa banùlamè basambùke ne tusunsa dikùmi pa dìbà dilòòlò dishààle, kushààle tusunsa makùmi àbìdì bwà dìbà dikùmi. Tutu pa ciibidilà tupàtuka pa kwamba kufika dìbà citèèmà ne tusunsa makùmi àsàtù. Nênteetè bwà kulongolola cyôci aci dilòòlò edi. Mvwa... ndi mushintùlùke muumùke ku mayiisha àànyì a cipròfetà âmvwà nyiisha mu nyìngulukilu wa bitùpà bishìlèshìlàngànè byà ditùnga, mwalùkile ku mayiisha à butangadiki. Nènku pa mayiisha à cipròfetà awu, tuvwa bafwànyine ànu kutungunuka naawù ànu nànku ànu nànku. Kàdi mpindyewu bwà kukòsoloja, mbyenzé bu bikolè, ne bìdi bishintulula mudimu wà—wà bwambi wônsò nkòòng.

Ne cìdì cìnsàka ku dyènza cyôci eci: mbwalu ditùkù kampànda, mfùmina ku Canada, ànu lwà kuulu eku mu Montana emu, bwebwebwe dìndà kampànda, Mukalenge Yesù... Ndi mumanyè ne bìdi byùmvwika byà bikèmesha, kàdi mvwa ngenda ngendesha kàshinyì, ki cintu kampànda kukòkaci ntèmà yànyì. Mêmè kuumvwa Dîyì, dijìkùke ànu munùdì nuumvwa dyànyì emu, dyàmba ne: “Dínà dyèbè ndifùnda pa mukùnà wawa.” Ki ntàngila, ne patwàkiimanà, Billy ne mêmè, Mukalenge Yesù kwamba Yè ne: “Alùkìlà paanyimà mpindyewu, ne ùdìbwinkè mu butangadiki ànu mûvvwà wenza amu.”

Ki bwà cinyì ndi apa dilòòlò edi, bwalu ndi mwalùkile cyàkàbìdì ku disambidila babèèdì. Kùdi bwalu bule pa cyôci eci, ne ndi mutwìshìbwè ne nwènù beedi bàà mikàbà yà mèyì kaaba aka, bàdì batèèleja mikàbà yètù yà mèyì, nudi bamanyè cìdì bwalu abu. Ndi cyàkàbìdì apa bwà kusambidila babèèdì. Kùdi mapà manènè bùngì cyanaàànà mu Nzambì. Nzambì ùdi mwà kukwàta mudimu ne dyónsò dyà kùdìwu dìdì Ye muswè adi bu twètù ànu mwà kuMulekela wènza nànku. Yéyè m’Mukalenge Nzambì.

Nènku mpindyewu, ndi nteeta bwà nciikadi...ngèpùka kutentekela bantu byanza bu mêmè mwà kucyèpuka, bwalu, mushindu awu, bìdi bimwèka bu ne (bìdi ànu mbímpè’s), kàdi bìdi bimwèka bu ne muntu kampànda, mufwànyine kwondopiibwa, wàmba ne: “Èè, Kampànda’s nguvwa mumutentékèle byanza.” Nwamònì anyì? Mêmè—mêmè ndi muswè kunùmònà ànu nwènù nutenteka byanza pa Yéyè, pa Kilistò.

Kiipàcìlì kàànyì kàdi ne, twètù bônsò tudi bamanyìne ku Mifùndù ne, dyondopa dyà kùdì Nzambì ndimana kupetela mwena kwitabuuja yônsò. Dìdi citùpà—dìdi citùpà cyà ku

bisaamà byà Yesù: “Yéyè wàkatàpiibwa mpùtà bwà kushipa kwètù kwà mikenji, ku mibündàbündà Yendè twàkamana kwondopiibwa. Ànu mwàkabàndishà Môsà nyòkà wà cyamù cyà kabanda mu cipèèlà amu, ki mwìkalà kàbìdì Mwânà wa muntu ne cyà kubàndishiibwa.” Kiipàcilà kamwèkàmwè aku.

Nènku cyôcì aci cìvwa ncifwànyikijilu, Kilistò ki mubidi wà bwalu. Nènku dîbà adi piìkalàbi—piìkalàbi ne difuta dyà cibawu dyà kale dìvwa difwànyine kupàtula dyondopa, ambààyaku tûng mùvwà dipyadipyà edi, didì ne bintu bitàmbe bwímpè, ne cyà kupàtula dyondopa dyà kùdì Nzambi.

Mpindyewu, Yesù wàkabàndishiibwa bwà kiipàcilà kamwèkàmwè kàvvà nyòka wa cyamù cyà kabanda mubàndishìlbwe aku (Yéyè wàkawijiibwa mpèkaatù): bwalu, nyòka awu ùvwa mwenza wà cyamù cyà kabanda, ne *cyamù cyà kabanda* cidi “cimfwànyikijilu cyà cilumbulwidi cyà Nzambi”; ne *nyòka*, mwikàle ùleeja “mulawu mwela nyòka” kacya ku budimi bwà Edènà, kwàkabwelelà mpèkaatù ne dìsaamà.

Nènku Yesù kêna mwà... Muntu nànsha umwe kêna mwà kuyiisha Yesù Kilistò bu difuta dyà cibawu kàyi ùyiisha dyondopa dyà kùdì Nzambi to. Muntu nànsha umwe kêna mwà kuyiisha Èvànjeeliyò kàyi ùyiisha dyondopa dyà kùdì Nzambi to. Bwalu, nwamònù’s, kwêna... mmufwànyìne kwikalà ne... kabiyi bikèngela bwà kwikalayè ne bintu kampànda to. Byenzè mùdi nyama yéyè mukukwâte, kabyèna bikèngela bwà wêwè kumukòsa ànu dikamà cyanàànà, anyì kumukòsa dibòko dyèndè—dyèndè anyì nî ncinyi cyônsò cìdiye mukujìngile naaci to. Mushipeèlè wewè ànu lwà ku mutu aku nènku wâjikijì bwèndè bwalu.

Nènku ki mùshindù wàkenzà Yesù pààkafwà Ye-pààkafwà Ye bwà mpèkaatù apu: Wàkashipa byônsò bìvvwàku mpèkaatù mwenzè abi, Yéyè kutùpikula mu kaabujimà. Tudi mpindyewu munkacì mwà kusuna di—difutu dyà ku yètù... mfrangà yà cyeyà cyà disùngidiibwa dyètù mu kaabujimà ku dilwa Dyèndè dyà cyàkàbìdì.

Pa nànkú, nudi bamòne’s, bubèèdì mbu—mbulela buludi kùdì mpèkaatù. Muntu kampànda wàkenza mpèkaatù. Kakùvvwa bubèèdì to ànu too ne pààkalwà mpèkaatù. Ne dîbà adi pààkabwelà mpèkaatù, bubèèdì bwàkamulonda. Bubèèdì ncyambìbwà cyà mpèkaatù. Nènku dîbà adi, pààkashipà Ye mpèkaatù, cyàkuumusha byambìbwà byônsò pàmwè nendè. Nwamònù’s, cìvwa ne cyà kwenza nànkú.

Mpindyewu, netwìkalè mwà kubala dilòòlò edi citùpà cyà Mufùndu.

Neyà bushùwà ne ndi ne disànkà dyà kwikalà, paanyimà pàànyi apa dilòòlò edi, ne musùmbà wànyì mwímpè wà bânà bëètù bàvvà mu disangisha mu dindà emu, ne njandula, mmònà Mwanèètù Shakarian lwà paanyimà pààpa, yéyè pèndè, ne

bààbúngì bàà ku balundà bàànyì, bakwàbo kàbìdì. Ndi ne disànkà dyàbúngì dyà kwikalakù neenù kaaba aka dilòòlò edi nwénù bânà bëètù. Nùnsambidìlaayikù mpindyewu, bu nwénù mwà kuswà.

Mpindyewu, tùbuululààyaaku mu Mifùndu, bwà kaacyena-bwalu kakesè cyanàànà, bu Mukalenge mwà kwanyisha.

<sup>2</sup> Nènku nwavùlukaayi ne, maalabà dilòòlò, nênsambidilè cyàkàbìdì babèèdì. Nènku mpindyewu pândì ngaakula... Tèèlejààyì, muntu yônsò àteetè bwà kwenza eci, kwindidi bwà cintu kampànda kwenzekaci to. Cintu cìdì cikèngela bwà wêwè kwenza, nkwitabuuja Nzambì mpindyewu mene. Mwitàbùùjè mpindyewu mene! Nwamònú anyi?

<sup>3</sup> Mpindyewu kùvwa midimu yà bwambi yà mìshindù yônsò. Nzambì, mu matùkù à ndekeelu àà, ngeela meeji ne, mmutùpèèshe byônsò bìdìYe naabì mu Mukàndà Wèndè. Byônsò bìtùYe mulayè, tudi babimònè, kàdì bìcìdi bìmwèka ànu bu ne bantu kabèèna mwà kubibàkula to. Aba bàdì balongolola bwà kubibàkula, nebàbìbàkùlè; ànu bôbò abu nkààyaabu. Cìdi cifofomija umwe; citàbeeja mukwàbò mêsù.

<sup>4</sup> Vùlukààyi ne, tudi twitabuuja ne Yesù Kilistò udi umwèumwè awu makèèlèlè, leelu, too ne kashidi. Yéyè kî mmufwè to, kàdi ùdi ne mwoyi bwà kashidi ne kashidi. Ne Yéyè udi kaaba aka dilòòlò edi. Tudi mu Bwikadi Bwèndè, dilòòlò edi, ne Yéyè ùdi kaaba aka bwà kushìndika ne kuvwija mwîmpè mulayì kanà wônsò wùvvwàYe mufile bwà ditùkù edi awu. Ne Yéyè udi umwèumwè awu makèèlèlè, leelu, too nè kashidi. Pa nànku, cyônsò cìvwàYe aci, ki cìdìYe, dilòòlò edi. Pa nànku túMwitàbùùjaayi mpindyewu, patùdì tubala Dîyì Dyèndè ne twakula Bwèndè Yéyè apa, bwà tusunsa dikùmi ne tútaanu, anyi makùmi àbidi tudi túlondà etu.

<sup>5</sup> Genèsè, nshapità wa 22, ku mvensà wa 7 ne wa 8, bwà mùshindù wa kupeta cyena-bwalu.

*Nènku Izàkà wàkambila Abraham tàwêndè, wàmба ne: Taatù wanyì: ki awu kwambayè ne: Mmémè ewu, mwanàànyì wà balùme. Ki yéyè ne: Mònaaku mudilù ne nkùnyi, kàdì mwânà wa mùkòòkò bwà mulàmbù wà dyosha awu wépi?*

*Ki Abraham kwambayè ne: Mwanàànyì wa balùme, Nzambì neàdìlongòlwèlè mwânà wa mùkòòkò bwà mulàmbù wà dyosha awu; ki kuyabò pàmwè bùbìdì bwàbò.*

<sup>6</sup> Mukalenge Yesù, bène shàku Dîyì Dyèbè, swàku bwà kaDyàlùkidi kadiyì cìdìdi dyenzè to, kàdi mamiinu àmatèku mu buloba bwà àpatulè lupàndù kùdì aba bàdì bálùkèngelà, ne mu nyumà ne mu mubidi. Tudi tudilàmbula twétù biinè Kûdì; disangisha, batèèleji, Dîyì, cyena-bwalu, dyumvwija. Nyumà

Mwîmpè àngatèku bukòòkeshi pa bumùntù bwètù, bwà tûmonè Yesù Kilstò. Amen.

<sup>7</sup> Ndi muswè kwakula ànu bwà tusunsa tukesè tûdì tûlondà etu mpindyewu pa: *Njila Wa Nzambì Mulongolola Bwà Ditùkù Edi.*

<sup>8</sup> Nzambì ùtu misangu yônsò ànu ne njila kampàndà. Kùdi njila yibidì, mbwena kwamba ne, njila yètù anyì njila Yendè. Nzambì ùdi ne njila bwà leelù ewu, bwalu Yéyè ùtu misangu yônsò ànu ùpenga njila bwà bintu byônsò. Nzambì, ku cibangidilu, ùvwa mumanyè ndekeelu, pa nânku Yéyè mmutèèke Mufundù Wèndè bwà cikondo ne cikondo cyônsò. Nénku cikondo aci, pàkaadici cîlwa... Mpindyewu kanùpangiku kumònà eci to. Cikondo aci, pàdici cîlwa, pa ciibidilu bambi mbabwelàkàne mu tusùmbu, ne bikwàbò, ne bilèlè, mu mùshindù wa ne bâdi bâshààla ntàntà wa mùliyô mujimà wa kilomèètà kule ne Dîyì.

<sup>9</sup> Ne pashiìshè Nzambì ùtu misangu yônsò ànu ùtùma muntu kampàndà mu cyalu, mupròfetà. Nénku mupròfetà ewu.... Nzambì kàtukù ùshintulula ndongolwelu Wendè to. Yéyè kàtukù ùshintulula njila Yendè to. Ùtu úcyènza ànu mùshindù wùmwèwùmwè awu misangu yônsò. Ùtu misangu yônsò ànu ne cyà kucyènza; Ùdi ne cyà kucyènza musangu ewu. Nénku, ku cyôci eci, nkùtu Nzambì ùkwâcila mudimu ne ùshindikila Dîyì adi. Ànu mûmvwà mwakùle neenù makèèlèlà dilòòlò awu amu, Nzambì wènza dyumvwija Dyèndè sungasunga. Nzambì kàtu ùkèngela muntu nànsha umwe bwà kuMuumvwijayè Dîyì to. Ùdi ùDyùmvwija Yéyè mwinè, ku diDishindika, uDìvwija dilelèlè. Nénku pàdi Nzambì wàmба ne Neénzè cintu kampàndà, pashiìshe Úcyènza, kakwèna kàbìdì mpatà pa bwalu abu to. Ki mùshindù wûdi Yè úcyènza.

<sup>10</sup> Pa nânku Nzambì mmutùsebèèle njila. Nzambì mmunangè bânà Bèndè. Mmunangè cisàmbà Cyèndè. Mmuswè kubàkwâcisha. Mmuswè kukukwâcisha kutàmba mûdi wêwè muswè dikwâcisha. Wêwè wíkalakù ànu mwà kutèèka aci mu mwoyi wèbè amu, bwà ne Nzambì mmuswè kukukwâcisha kutàmba mûdi wêwè muswè bwà kudikwâcisha. Kàdi Yéyè ùdi ne njila, ne awu ki njila umwèpelè wakwâcila Yè mudimu nku njila Wèndè. Udi ne cyà kulwa kuupuka ku mishìngà Yendè Yéyè, kí nku mishìngà yèbè wêwè to. Mishìngà Yendè Yéyè! Wêwè udi muswè kucipetela mu mùshindù kampàndà, kàdi Yéyè—Yéyè ùdi ùkupèèshilacì mu Wendè mùshindù.

<sup>11</sup> Bu Naamànà uvwa utùkina mu mâyì a—a—a Yadènè amu awu. Môna's, wàkamba mùvvà mâyì à mu ditùngà dyàbò matàmbe kutòòka ne kulengela, kàdi kí ng'aci cìvwà mupròfetà mwambè nànsha. "Dînè emu." Kudiinayè musangu wùmwè, nsudi miikàle ànukù; misangu yisambòmbò, micikàle ànukù. Bìvwa bìkèngela kutùmikilayè ne kulonda njila wà Nzambì.

Nènku pààkatùmikilàye mu kaabujimà njila wà Nzambì, nsudì yàkaya mwamwamawa.

<sup>12</sup> Nènku ndi ngàmba, dilòòlò edi ne, twêtù batùmìkile njila mulongolola wa Nzambì, nsudì neyùmukè, bubèèdì nebùùmukè, byônsò nebyùmukè, kàdi bikèngela tulondè njila Wendè bwà ditùkù edi. Mpindyewu, kudiìnà kwà mu Yadènè kî nkufwànyine kwikalà ne dikwàcisha mpindyewu to; aci cìvwa mbwà Naamànà. Mikenji yìvwa mbwà—mbwà beena Yudà. Ngâsà nkùdì Kilistò.

<sup>13</sup> Kàdi cikondo ne cikondo cyônsò cidi ne cyàcì citùpà cyà Èvânjeeliyò cikààdì cimana kudyànjila kwamba. Bible ewu ki dibuulula mu kaabujimà dyà Yesù Kilistò. Kakwèna mwà kwikalà kàbìdì cyà disàkidilaKù, anyì cintu kampàndà cyà dyumushilaKù to; muntu udi ucýènza mmwedìlbwè mulawu. Katwèna mwà kusàkidilaKù cintu nànscha cimwè, kuumushilaKù cintu nànscha cimwè to. Tudi ne cyà kutàngila Mwômò emu bwà kumònà cidi cilayìlbwe bwà cikondo eci, ne pashìishe kucìmònà cyènzekà. Awu's n'Nzambì munkaci mwà kuumvwija Dîyi Dyèndè Sungasunga. PààkàmbàDi ne: "Virgò neìmitè difù," s'wàkiimita. Adi ki dyumvwija dyà Nzambì dya Cyôcì aci. CidiYe ùlaya aci, ki cidiYe wènzà.

<sup>14</sup> Mpindyewu tudi tumònà ne Nzambì kàtu ùshintulula ndongolwelù Yèndè yà dyenza maalu to. Ùdi ùbyènza misangu yônsò ànu mùshindù wùmwèwùmwè awu. Twêtù tudi tushintuluka ku musangu ne ku musangu bwalu tudi ne mikàlu. Tudi twenza bilèmà byà mìshindù yônsò, ne tudi mwà kudyàkaja ne kulwa batàmbe bwîmpè. Kàdi Nzambì Yéyè kêna ne mikàlu to. Dyèndè dipàngadika dyà kumpàla ndipwàngàne dìbà dyônsò. Yéyè kêna mwà kulwa wa meeji matwè to. Yéyè ùvwa... Yéyè ki mushìmì wà lungènyì lwônsò. Yéyè ki lungènyì lwônsò. Yéyè ùdi bukolè bwônsò, wa ngulu yônsò, udi myaba yônsò, mumanyi wa byônsò, ne kàyi mikàlu. Ki bwà cinyì, pàdìYe wàmaba cintu, swìkilàKu musùùkà wèbè, bwalu ncilelèlè.

<sup>15</sup> Mpindyewu èkèleeziyà mikwàbò yìtu yàmба ne: "Nènku twêtù katùtu twitabuuja *Cikampàndà*, kàdi tudi twitabuuja *cikansanga*." Nzambì kààdyàkulumbulwishilakù bàà—bàà pa buloba ku èkèleeziyà kampàndà nànscha. Yéyè udi ùbalumbulwishila kùdi Yesù Kilistò, ne Yesù ùdi Dîyi. NeAlumbulwishilè èkèleeziyà ku Dîyi.

<sup>16</sup> Nènku piikalabi ne *Eci ki* dibuuludiibwa dyà Yesù Kilistò bwà bikondo byônsò, ne bwà eci cikondo, Mmubuulùlè mu Bible ewu cìvwàYe mwà kwenza mu eci cikondo; ne patùdi tuCimona cìcyènza, patùdi tuMumònà wènza cìvwàYe mulayè bwà kwenza. Ki ndilediibwa dyà kùdi virgò nànscha; aci ncyà kùkaadi bidimu binunu bìbìdì. Kàdi ncyàkalayàYe bwà kwenza leelù, cyàkàmbàYe ne Neënzhè leelù ewu aci, ki cidiYe leelù ewu ncyôcì aci.

<sup>17</sup> Misangu miyulè, bantu bàtu bàmba ne: “Èè, mêmè ncyêna ngiitabuua *Cikampànda* to.” Èè, udi mupetè cyàkàbìdì mumvwiji wa Evà awu; yéyé ùdi wàngata ànu citùpà cyàDì, kàdi kí n’Dyôdì dyônsò to.

<sup>18</sup> Pa nàku tudi baswè kuvùluka ne Nzambì ùdi ùshààla ànu umwèumwè awu kashidi. Dîyi Dyèndè, ne cìdiYe wàmба, neÀcyénzè.

<sup>19</sup> Cileejà ne Yéyè kàtu ùshintuluka to. Mu Genèsè 1, Wàkamba ne: “Dimiinu dyônsò dìvulanganè bilondèshile mùshindù wàdì. Dimiinu dyônsò dìvulanganè bilondèshile mùshindù wàdì.” Nènku ànu mwába awu, tudi tulenga ànu mwaba awu mene cintu cìdi cìbyànkulà pànsì bwônsò beena ne mutu mmufùmíne ku dishintuluka abu. Kanwènakù mwà kusopakajulula bintu to. Udi wangata bu mùdi kabalù ne—ne...mpu—mpundà, ubissopakaja pàmwè, upeta kampundu, kàdi kampundu kakèena mwà kusangila ne kakwàbù ne kulela kakwàbò kampundu to. Bìdi biìmanyina ànu apu. “Dimiinu dyônsò mu mùshindù wàdì.” Bàdi mwà kwenza disopakaja, kàdi bìdi bishintuluka byàlukila cyàkàbìdì, bìleeja ne kabyèna bishintuluka bìbànda mùshindù awu to. To, mukalenge. Bìdi biìmanyina ànu apu. Udi mwà kusopakaja mbokà ne cìngà cintu, pàmwè, ne kupàtulaku shû, kàdi kwêna mwà kumusopakaja cyàkàbìdì to. To, mukalenge. Udi mwà kusopakaja ditalà dyà cítükütukù; kàdi kùnununààku ditalà dyà cítükütukù adi, kwêna upeta cintu to. Bikèngela ùcìsopàkàjè musangu wônsò. Bwalu, Nzambì wàkamba ne: “Dimiinu dyônsò dìvulanganè bilondèshile mùshindù wàdì.”

<sup>20</sup> Nènku mpindyewu, ku disopakaja dyà bintu, tàngilààyi nùmonè cìdi bàà pa buloba bakabwelèmu leelù ewu. Mvwa mbala kaabwalu kampàndà mwaba ewu, mu cikàndàkàndà cyà *Reader’s Digest* emu, bàmba ne: “Mu bidimu makùmi àbìdì kuumukila ku mpindyewu, bakàjì kabààkùlela bânà to, byôbì bitùngùnùke nànkú. Bâdyadya byàkudyà bisopakaja”. Bwalu bùdi ne, mbacisopàkàjè, ne awu kí mmùshindù wùvvà mutu mufùkùlbwe to, bwà kudyà cyàkudyà cyà mùshindù awu. Cìwà cyenjìlbwe bwà kutuutakeena naaci mu...anyì kucìdyà mu mùshindù wàkafùkiibwàci awu. Ki cìdi cyènza, leelù ewu ne, kabèèna mwà kulama minyìnyi to ne bintu byônsò bìdi mùshindù wùdìbi ewu, mbwalu mbisopakaja, bikùnyìlbwe bitenteka, nènku, kaa, mùshindù wônsò. Bìdi ànu bisopakaja byônsò. Mbikafikè mu mùshindù wà ne bukwàbantu bwônsò nkòòng munkacì mwà kubùtudiibwa ku byenzedi byàbò bôbò biinè, mu kuteeta kwangata cintu cìwà Nzambì mwenzè címpè, kàdi kucishintulula ne kucyènza mu mùshindù mukwàbò, mu wàbò mùshindù wà sungasunga. Cilekèlaayi mùshindù wùvvà Nzambì mucyénzè awu!

<sup>21</sup> Bàkaadi mene bakafike too ne mu mùshindù wà bâteeta kusopakaja maèkèleeyiyà, leelù ewu; bùùmusha ku dibàtiiza

dilelèlà dyà Nyumà Mwîmpè, bàya ku dilabulangana dyà ku cyanza; ku dimyaminangana kampàndà dyà mâyì pa mutù, ku dibàtiiza dyà mu mâyì. Kaa, ekèlekèle! Cintu mu kaabujimà's ncisopakaja. Tudi baswè kwalukila.

<sup>22</sup> Cikùnyìlbwà cisopakaja, bìkèngela ùcyéngèlèkè ne ùcìmyaminè mâyì a bwanga, bwà kucìlama ku twishì ne ku bijàngàlalà. Kàdi kí ncikùnyìlbwà cishùwashùwàlè cyà bukolè to; cyôci ncikàyàbàle, cikolákàne, twishì katwèna tûfikapù to. Cyôci cidi ne bintu bikùmbàne munda mwàcì bwà kwipata kishì kule.

<sup>23</sup> Ne ki mùdì mwena Kilistò mushùwashùwàlè nànku! Kabyèna bìkèngela bwà wêwè kumwengeleka ne kumutuuta cyanza pa makaaya, ne kumwambila *cikampàndà*, *cikansanga*, anyì *cikankèngà* to. Yéyè ûdi ne cintu kampàndà munda mwèndè, dibàtiiza dyà Nyumà Mwîmpè, dùdì dìpata bikwàbò byônsò kule naaci. Kabyena bìkèngela bwà kumusèngeleela to, bwalu yéyè ncikùnyìlbwà cyà ku cifùkilu cyà Nzambì. Yéyè ûdi ne cintu kampàndà munda mwèndè cìdi cìlwangana mvità. Mwena Kilistò ùtu ùlwangana mvità bwà kaacentimètre kônsò kàà buloba bùdiye mwimànyine aku. Yéyè ûdi ne cyà kwenza nànku, piikalàyekù ùtèkemena bwà kwikalayè ne mwoyi. Nènku, mu dicyènza, kùdi Cintu kampàndà munda mwèndè amu cidi cimukùba.

<sup>24</sup> Evà wàkateeta bwà kusopakaja Dîyì, ku cibangidilu. Nzambì ùvwa mumwambile ne: "Ditùkù dinwàkùdyà, ditùkù adi ndinwàfwà." Kuteetayè bwà kuDisopakaja ne dimanya dyàkamupèeshà Sàtaanà adi. Kàdi pààkenzaye nànku, s'ùjímijile bukwàbantu bwônsò nkòong, ànu mwaba awu, mubùfile kùdi dyabùlù, pààkateetaye bwà kusambakaja ne dimanya Dîyì dyà Nzambì dùdì kadìyi disambakaja adi.

<sup>25</sup> Kacyèna cifùmina ku dimanya dyà Dîyì to, cìdi cìlwa ku bukolè bwà Nyumà Mwîmpè! "Kí nku bukolè, ku ngulu to, kàdi nku Nyumà Wanyì," mùdì Mukalenge wàmба. Mûshindù awu ngùdì Nzambì ùcyènza. Dîyì dyà Nzambì n'Dimiinu dyà Mwoyi wà Cyendèlèlè.

<sup>26</sup> Wêwè uteeta kuDisopakaja, ciwènzà ncinyì? Neudishebèye wêwè mwinè naaDì. KaDyàkukùmbananakù to. KaDyàkubwelakanakù to ànu mùdì mâyì ne mafutà kabiyi mwà kubwelakana amu. KaDyàkubwelakanakù to.

<sup>27</sup> Kabàtukù, mu mìshindù yônsò, mbatèète bwà kupeta cintu nànsha cimwè cìdi citàmbe mûshindù wà Nzambì wà dicyènza bwîmpè. Nudi bamanyè's, kacya kabàtukù bapetè mûshindù kampàndà, mutàmbe bwîmpè, bwà kazòòlo kuledibwakù pa buloba apa, kutàmba wà kudìpatukila mu cizubu cyàkù aci ne dituuta dyà mwînù to. Nuvwakù bamanyè cyôci aci anyì? Kacya kabàtukù banji kupeta mûshindù mutàmbe bwîmpè to. Kakwàcikwètù kakesè aku nkaledìibwe ne kaadyûlu kakesè

ku ndekeelu kwà—ku ndekeelu kwà mwînù wàkù aku. Nènku kaamwînù kakesè kàdìku naakù aku, mbwà kuya kakwàta mudimu ne kukoonya, kukoonya kumpàlà ne paanyimà, too ne pàdìku kàtwàdija kupàtula mutù wàkù, kàpàtula mutù wàkù awu pambèlu, kàshìya njila wàkù bwàshì. Ki mùshindù mulongolola wa Nzambi. Wewè mukàkòke mukàpàtùle mu cizubu amu, s'neukàfwishishè. Kakààkwikala ne mwoyi wewè mukàkòke mukàpàtùle mu cizubu amu to. Bìkèngela kàlwilè mu njila wa Nzambi.

<sup>28</sup> Ki lutàtu ludi naalù beena Kilistò leelù ewu ndwôlò alu. Tudi babàlaabìdile bikolè, ne balabuùlàngànè naabò ku byanza ne babàbwéjè mu musokoko, ne babàshiye bàà mu èkèleeziyà. Cidì cibàkengela ndisambila dyà cyena-kale dyà ku cyoshelu kùdibò bàsambila bàsambidilamù, too ne pàdìbo bàdilwila, bàbwela mu njila mulongolola wa Nzambì, too ne pàdìbo bàdisùlula bôbò biinè ku maalu a pa buloba. Lutàtu lùdiku, leelù ewu ndwàne, bàdi bàfundiša dînà mu mukàndà ne bàdishiya bàà mu èkèleeziyà, ki cyônsò cidíku ncyaci. Kàdi njila wa Nzambì, njila mulongolola awu, nkushààla mwaba awu ne kuyooba kumana, too ne pàdì Nzambì ùkupèësha Dilediibwa dipyadipyà. Ncyà bushàwà menemene. Kumupàtulamù, necimushebèyè.

<sup>29</sup> Ki bwalu mbwabù, leelù ewu, kùdì bantu. Dilediibwa dipyadipyà, bàdi bàdyèpela. Kí mbadìswè to. Kaa, mbapingàje cintu kampànda pa mwaba wà Dilediibwa dipyadipyà adi ne: “lwâyi nwitabuujè, ki cyônsò cìdì cikèngelà bwà nwéñzè.” Dyabùlù’s ùtu wìtabuuja, yéyè mwinè awu, kàdi nwénù’s nudi bamanyè ne kí mmuledìbwé cyàkàbìdì. Kùdi Dilediibwa dipyadipyà. Kùdi cintu kampànda cìdì cìdìfila, mbyenzè bu ne kí mbikùmbànàngànè to, kabiyi bìkùmbanangana ne lulabulu lwà bàà pa buloba to.

<sup>30</sup> Dilediibwa kanà dyônsò edi dìtu ànu mbukooyà. Nànsha dyenzékèlè penyì. Diìkalè dyenzékèlè mu cikùmbi cyà ngulube, anyì-anyì mu lùpitàadì. Dilediibwa dìtu ànu mbukooyà.

<sup>31</sup> Ki mùdì kàbìdì Dilediibwa dipyadipyà! Nedikwenzèjè bintu byûvwà kùyikù mufwànyine kwela meeji ne uvwà mufwànyine kwenza to. Nedikufikishè ku ditwà binù ku cyoshelu nedikudidisha mwadi, ku dikwelesha mikunda, ku dikùpula bilaabu kwísù kwèbè, ku dikwelesha byanza muulu, ku ditumbisha Nzambì, ku dyakula dyà mu myakulu, ne bintu byà mìshindù yônsò. Dilediibwa dipyadipyà nediyènзè nànkú bwalu nnjila mulongolola wa Nzambì bwà kulediibwa cyàkàbìdì.

<sup>32</sup> Bikèngela ùfwé. Bikèngela ùfwé kumpàlà kwà wéwé kulediibwa cyakàbìdì. Dimiinu kanà dyónsò edi didi ne cyà kufwà kumpàlà kwà kufùnlulukadì. Dyôdì kadìyi difwè to, didi dishàala nkààyaadì. Bikèngela muntu àfwe ku ngeelèlù wendè yéyé mwine wa meeji. Bikèngela àfwe ku ngeelèlù wa meeji wa ku cintu kanà cyónsò pa kuumusha Dìyì dyà Nzambì, ne

àlwe mu njila Wendè. Ki cyalu cyà Nzambì ncyacì. Katwèna tutwìlangana Nendè mu meeji ètù to; tudi tutwìlangana Nendè pa cìdi Ye Yéyè mwambè bwà kwenza. Ki njila mulongolola wa Nzambì bwà cyôcì nyawù. Bantu bâdi bacyèpuka; kí mbaciswè to. Kàdi ncilelèlà, nànscha nanku. Necìïkalè, cìdi cilela lufù, ne bikèngela ûfwe, ûfwe ku ngeelèlù webè wa meeji.

<sup>33</sup> “Èè, ndi mumanyè ne Bible ùdi úcyàamba, kàdi mêmè ncyêna mwà kucyùmvwa to.” Dîbà adi shàala mwaba awu too ne pàdì Nzambì ùcibuulula. Neyà bushùwà. Cìdi ne... Ki Dilediibwa dipyadipyà ndyôdì adi.

<sup>34</sup> Mabata ne byokòsò, kabàtu bânjì kupeta mùshindù mutàmbe bwímpè bwà kuyabi ku Sud, kutàmba wà kukÙngwila dyàmbedi to. Ne aci ncyà bushùwà. Neùbimònè bidikÙngwija byônsò pàmwè ne bidilwila nkààyaabì, disàkiibwa dyà mùshindù kampànda dibikòka pàmwè, nènku bidikÙngwija mu cisùmbu kumpàlè kwà kubùùkabì, kumpàlè kwà kuyabì ku Sud. Ncinyì aci? Ncikondo cyà ditàbuluja, pàdibi bidisangisha byônsò pàmwè apu. Ukààdikù muumvwè mutooyi wà nànscha kacya bààkulela, bu kuumvwa pàdì byokòsò abi bidisanga, anyì mabata awu anyì? Kacya ncítukù mwanijì kuumvwa wà nànsku to! Ne àdi ne... Kakwèna mukwàbò, mùshindù mutàmbe bwímpè bwà ôwò kucyènza to.

<sup>35</sup> Misangu yàbûngì, lwà mu meetu à ku nord kwàka, ntù mbandila mbangilu wa nzànzànzà wà muvù wà mashìka, mu Canada. Musùmbà wà mabata malela ànu mu dyôdì dijiba adi, kaàyikù kacyà muumùke mu dijiba adi to, kakwàcikwètù aka kakayikù kuumùkemù to. Kàdi katancì aka, kaalupeepèlè katalàle kupwekakù kàfùmina ku Nord. Kaadibata kakesè kalùme, kakesè kàà kale aka, nkalela ànu bwà kwikalakù kalombodi, kàjuukila ànu munkaci mwà dijiba adi, kàtadika kaamwînù kààkù kakesè aku muulu, kënza hoo-hoo misangu yìnaayi anyì yìtaanu, ne dibata dyônsò dìdì mu dijiba amu dilwa buludì kùdiku aku. Nènku kàjuukila mwaba awu, kàya buludì katàngile ku Louisiane ne mwàkù mwônsò, too ne ku madimi à loosà aku.

<sup>36</sup> Bwà cinyì? Kacya kabàtukù bakàpetèle mùshindù mutàmbe bwímpè wà kufikakù kuntwaku to. Kwêna mwà kuyìsaka pàmwè to. Wêwè tuyélè mu cipangu ne... mu musàsà, ne muya naayì kuntwaku myela mu màshinyì a cisemuna. Dibata adi dìdi ne cyumvwilu cîmpè kutàmba aci. Nènku wêwè mudyélè mu musàsà awu, bwà kuya naadì kuntwaku, ndimanyè ne bàyaaya naadì ku cishipeelu. Neyà bushùwà menemene. Dyôdì diyaayakù mu mùshindù mulongolola kùdì Nzambì.

<sup>37</sup> Mùshindù awu ngùdi wùkèngela bwà muntu kwenzayè leelù ewu, kí nkusakiibwa mu musàsà kampàndà wà cyenamàngumba nànscha. Kàdi kubwela mu mùshindù wùdì Nzambì mwambè bwà kubwela, ku dibàtiiza dyà Nyumà Mwîmpè ne

Dilediibwa dipyadìpyà, ditàbuluja dyà bantu bàlwa mbìmbìmbì. Kacìyi dikashààlà dyà wa mu èkèleeziyà, dyà bàsèngelélangana kumbèlù ne kumbèlù, ne dyabanyinangana dyà bibèjibeji to; kàdi Dilediibwa, kulediibwa cyàkàbìdì, muujìlbwe tèntè ne Nyumà Mwîmpè, njila wa Nzambi, kudìsùùlula ku maalu a pa buloba. Cyà bushùwà! Kwitabuuja Dîyì dyà Nzambi! Dîbà dyákùmbanyi. Ki citùdì ne cyà kwitabuuja ncyòcì aci.

<sup>38</sup> Muntu, kwêñàku mwà... bantu nànsha bôbò bûngì bìshi bâdì bafwànyìne kuteeta bwà kuya ku dijiba dyà mabata adi kuntwaku kwamba ne: "Mpindyewu anjì indìlaayi kakesè, nwêñù tuumabata tukesè etu, ndi ne bwalu bwà kunwàmbila. Tudi ne dibata dilongè kàalaasà mwab'ewu. Didi ne dìpòlomè dyà Ph.D. ne dyà LL.D. Ndi nnwàmbila, dyôdì dìdi mwà kunùlombola."

<sup>39</sup> Mabata awu's àdi ne cyumvwilu citàmbe aci ku bwîmpè. Èyowà's, mukalenge. Wôwò kaëna àcyùka byà túlaasà tulonga tutàmbe bwîmpè abi to, cyônsò cìdiku aci. Mmàmanye mpungi kampànda udidi dyèla. Ndisàkiibwa kampànda. Kaa, ekèlekèle! S'bivwa bikèngela bwà èkèleeziyà kumanyayè Dîyì dyà Nzambi mùshindù awu!

<sup>40</sup> Cidi ndîyì kampànda dilubidile. Bible mmwambè, Pôlò mmwambè ne: "Pììkala mpungi ùpàtula mwadi mulubidile, udi mwà kudilongolola ku mvità nganyi?" Ncyà bushùwà, èkèleeziyà yéyè—èkèleeziyà yéyè ùpàtula dîyi dilubidile dyà "diya kashààla wa mwómù."

<sup>41</sup> Nzambi mmwambè ne: "Dilediibwa!" Cyàkenzà Dilediibwa musangu awu aci, Dilediibwa dìdi dyènza cintu cimwècimwè aci leelù ewu, bwalu Yesù Kilistò ùdi umwèumwè awu makeèlèlà, leelù, too ne kashidi. Cìvwà Ye musangu awu aci, ki cidi Ye leelù ewu. Cyàkenzàbo musangu awu aci, ncintu cimwècimwè citùdì twêtù twenza leelù ewu eci. Mùshindù wàkàCipetàbo musangu awu, ncintu cimwècimwè aci cìdibo bènza leelù ewu. Cintu cimwècimwè aci cìdibo naaci leelù ewu, ki cìvwàbo naaci kale wàwa. Cyôcì ànu cilwè, Cidi cilwa mùshindù awu. Ki njila nyéyè awu, njila mulongolola wa Nzambi. Kàtu ûshintulukakù to.

<sup>42</sup> Mabata kaàtu àshintulukakù to. Àtu àdikùngwija ônsò nkòòng, ku cidimu cyônsò, àya ku nord, ku sud, ne mùshindù wônsò wùyaayàwu awu. Àtu ànji àdikùngwija dyàmbedi.

<sup>43</sup> Mùshindù awu ki wùdì Nzambi wènza. Ùtu ùtùma Dîyì Dyèndè ku muvù, mu muvù awu, dîbà adi Didi dimwèneshiibwa. Nènku nànsha maalu makwàbò bûngì kaayì ènzèka; pàdibò bàmòna Dîyì dyà Nzambi dilaya bwà ditùkù adi, diikàle dishìndìkùibwe ne dilayìlbwè, kakwèna cintu nànsha cimwè cyàbiìmanyikà to. "Virgò neimitè difù." Nènku pààkambàbo...

<sup>44</sup> "Mukalenge Nzambi wetù neàjuulè Mupròfetà mufwànàngàne naanyì," mwàkambà Môsà.

<sup>45</sup> Nènku pààkamònàbo Muntu ewu ùlwa wènza bintu byàkenzà Ye abi, bààkamanya ne ùvwa m'Maasiyà awu. Pààkamònà Filìpò aci cyènzeché, wàkamba ne: “Wêwè udi Kilistò. Udi Mfumù wa Izàlèlè.” Wàkacimanya bwalu Dîyì dìrwa dicilayè, ne cìvwa ne mwoyi mu ditùkù adi. Nànscha byôbì ne Bâfaalèsà, Basadokà bûngì munyì bàvva biimàne mwaba awu, Balongeshi bapilùke mu Bunzambì, kabyàkamwimanyikakù to nànscha kakesè, bwalu yéyé ùvwa wènda ùkèbangana ne cimanyinu aci. Pààkacimònàye cyènjiibwa, ki cìvwà cimanyinu cyà dìbà adi ncyôcì aci. Ki cìvwàbò bôbò bindile, njila mulongolola wa Nzambì. Èyowà's, mukalenge.

<sup>46</sup> Mpindyewu, kwêna mufwànyìne kupèèsha dibata dilonga dyà kàlaasà to. Kî ndifwànyine kulonga to. Kî ndifwànyine kucijinga to. Makwàbò mabata kî mmafwànyine kudilonda to, nànscha dyôdì dyambè ne dìdi ne màpòlomè bûngì munyì. “Mpindyewu, tàngilààyi kùneeku, mêmè ndi tuyè ku cilongelu cyà mabata. Ndi mumanyè byônsò bìdiku. Ndi mupetè dìpòlomè. Ndi mumanyè bintu byônsò ebi.” Kacyèna ne dikwàcisha to nànscha dikesé. Nànscha dimwè dyà ku mabata makwàbò awu kî ndifwànyine kudilonda to, pììkalàwu mabata mashùwashùwàlè, amen, bwalu ôwò mmindile cimanyinu kampànda. Pàdìwu àmòna cimanyinu aci, àdi àciìtabuuja.

<sup>47</sup> Nènku pììkalàbi ne dibata dìdi ne mùshindù wà dicimanya, kàdi twàmbè bishi bwà mwena Kilistò muledìlbwe cyàkàbìdì? Bìwwa bìkèngela bwà twêtù kumanya Yesù Kilistò mu bukolè bwà dìbìlkà Dyèndè dyà ku lufù. Cyà bushùwà's. Nzambì ùdi ucyènza bilondeshile mùshindù mulongolola wà Nzambi.

<sup>48</sup> Vùlukààyi ne, dilonga dyà túlaasà kî ndifwànyìne kwikala cyamù cyà mudimu bwà kuàlombola ku mwaba mulongolola wà Nzambì to. Cyamù cyà mudimu cìdìwu naaci ndisàkiiibwa. Nènku ôwò, mabata awu, mmamanyè ne disàkiiibwa adi ndyàbàfikishà ku mwaba mulongolola wà Nzambì.

<sup>49</sup> Ki mùdì kàbìdì Nyumà Mwîmpè ùya ne Èkèleeziyà ku mwaba mulongolola wà Nzambì. Ki nkukadìvwija wa mu èkèleeziyà kampànda to, kàdi nkukujiibwa tèntè ne Bwikadi Bwèndè, bwà kumònà Dîyì Dyèndè dimwènèshìlbwe, dishindikìlbwe. Ki njila mulongolola wà Nzambì bwà èkèleeziyà nyéyé awu, misangu yônsò, bwà bantu, bwà kubàfikisha ku mwaba wùdi Nzambì mubàlongòlwèle. Ki cìvwà menemene cikèngela bwà èkèleeziyà kwikalayè leelù ewu. Mpindyewu, tudi bamanyè aci ncilelèlè.

<sup>50</sup> Kakwènakù mùshindù mutàmbe bwîmpè bwà... Kacya kabàtukù banjì kupeta mùshindù mwîmpè bwà mwânà wa mu dibòkò kupetayè cìdìye ùjinga kutàmba kudila mwadi to. Wêwè mumupèeshè kangonga, wamba ne: “Junior, wêwè nyawù ucidi ànu ne matùkù asàtù cyanàànà, kàdi mpindyewu paùdì muswè,

wéwè ujinga bìbèrô byèbè, bàndisha kangonga aka ùkàdidishè,” umonèbi ní byákùmbana. Kabyàkukùmbanakù to. Mwânà wa mu dibòkò ùdi ùdila bwà cìdìye ùjinga aci. Ki njila mulongolola kùdì Nzambì nyéyè awu. Paùdì utàmba kwela mbìlà... Kwèdi kakwàcikwètù aku mfimbù to, kàdi kôkò kàlonda ànu njila mulongolola kùdì Nzambì. Yéyè mmuswè cintu kampàndà. Aci ncyà bushùwà. Ki mùshindù ùmwèpelè ùdiyè mumanyè bwà kubìikidilayè mamwèndè; kucyèlela mbìlà mikolè, kucìdidila mwadi. Ncyà bushùwà.

<sup>51</sup> Ki cìdì Nzambì ùtùmina bânà Bèndè dìyì. Ki cìdì Nzambì ùtùmina bânà Bèndè beena kwitabuuja dìyì. NeìdìYe mwenzè. Kî mmiyikì yà mamanya à mu mitù to, kî ntèòlòjì kampànda munène, tèòloji wa dilongeshangana to. Yéyè mmuswè bwà wéwè wéle mbìlà bwà bìdì bikukèngela. Nènku aci ncyà bushùwà, kubyèlela mbìlà! Wéwè mutambe kutàndabala ne muumàkàne, kwàdyàkucipetakù to. Wéwè mudilongòlòle bwà kuteketanganakù ndambù, ne kudila mwadi, Nzambì neàkupèshèci. Yéyè ùtu muswè kuumvwa bânà Bèndè bàdila myadi. Elà mbìlà kùdì Nzambì bwà bìdì bikukèngela! Ki cìdì Nzambì muswè. Ki njila Wèndè mulongolola nyéyè awu. Übìdidile bikolè! Ki mùshindù wùdì mwânà wa mu dibòkò ùdila; ki mùshindù wùdìYe muswè bwà wéwè kudila.

“Kudila bikolè too ne dìbà kaayì?”

<sup>52</sup> Mwânà ùtu wela mbìlà too ne dìbà kaayì? S’ntoo ne pàdiye ùsànkishiibwa. Nènku mùshindù awu ngùvvà wùkèngela bwà mwena Kilistò mulelèlà kwenzayè, mwânà wa Nzambì. Wéwè mumònè ne Nzambì mmufile mulayì, kuwùlekèdì to, elà mbìlà too ne pàdiwu wàndamunyibwa. Elà mbìlà too ne paùdì umònà Nzambì úshindika Dìyì Dyèndè. Pàdì Nzambì úshindika Dìyì Dyèndè, ne ùjaadika ne dìkaadikù, dìbà adi kabyèna bikèngela bwà wéwè kwela kàbìdì mbìlà to; wacipecì, asà lwendu ùye wenda uMusàkidila bwà bwalu abu. Pawùdì kùyi mwanjì kwenza aci to, elà mbìlà mikolè too ne paùdì ucipeta. Mêmè ntu munangè aci, nnàrukila, kacya ànu ngààkwata.

<sup>53</sup> Kî ncikùnyìbwà cisopakaja to, kî ncyà cikèngela kwengeleka ne kulaaba cyanza, ne kwenda naacì cyambula to. Beena Kilistò mbantu bilelèlà, bishuwashùwàlè, bilela, byà Nzambì. Bàdi bàlwangana mvità bwà kaaba kààbò, ne bàlwangana too ne pààjikà bwalu bwàbò pa buloba ebu. Muswakeenu wàcì wônsò wùdì mmvità.

<sup>54</sup> Nzambì wàkambilà Môsà ne Wàkamupèèsha buloba abu. Wàkambilà Yoshùwà ne: “Mwaba wônsò wùdì dikàsà, anyì cidyacilu cyà dikàsà dyèbè, cidyata, ngààkùpèèshiwù.” Bivwa bikèngela bwà kulwanganaabò bwà katùpà kônsò kààcì. Twêtù kàbìdì tudi tulwangana bwà katùpà kônsò kààcì. Kî ncintu cyà bikèngela kwengeleka ne kulaaba cyanza to, ne kwenda naaci mùshindù awu, kwamba ne: “Èè, nényè neebè kuntwaku,

tùmonèbi cyûdì wela meeji bwà bwalu abu aci. Ùfilè webè mmwènenu.” Awu kí mmùshindù wà kulwa nànscha.

<sup>55</sup> Lwâ ne dikàngà dyà mwöyi. Lwâ wamba ne neùshaalèku too ne pààjikàku. Shààlakù too ne pàdì Nzambì wàndamuna ne ùshìndika. Muntu udi witabuuja Nzambì, ùdi mwà kumònà Bwikadi bwà Nzambì, kuumvwa Bwikadi bwà Nzambì, kulengela Bwikadi bwà Nzambì, ne kumanya ne Ùdipù. Yéyè ùdi kaaba aka bwà kwandamuna cintu cyônsò cyàkafidilà Ye mulayì bwà ditùkù edi. Dibà adi, elà mbilà too ne paùdì ucipeta! Shàala kacya ànu wâMupyà. Kùùmukukù to, nànscha byôbì bikèngela bwà wèwè kushààla muunyà ne bufùkù. Nzambì kí mmuswè bwà Bèndè bânà kutèèlejabò miyikì yà mamanya à mu mitù to. Mmuswè bwà kuCyèlabeledò mbilà, too ne pààshìndikiibwà mulayì.

<sup>56</sup> Abraham kaaba aka ùvvà ùkèngela mulàmbù. Cyàkenzékà ncinyì? Nzambì wàkamulongolwela mwânanà wa mùkòòkò. Ki njila uvwa mulongolola wa Nzambì nyéyè awu. Ùvwa ùkèngela mulàmbù, ki Nzambì kuwùlongolola Ye Paanyimà, kubìikilayè mwaba awu ne Yèhowàh-Yilè, “Mukalenge neàlongololè Yéyè mwinè mulàmbù.”

<sup>57</sup> Mpindyewu, Yobò, musangu kampànda, mupròfetà wa kale awu, Yobò. Ùvwa mupròfetà. Wàkapeta lutàtù. Sàtaanà ùvvwa mujingè kumuteeta, ki kumutwàye byûjà. Ki kwangatayè bânà bëndè, kwangatayè bimunà byèndè, kwangatayè byônsò bìvvwàye naabì, ne kumutwàye byûjà.

<sup>58</sup> Dyà bëndè bamusàmbi bâlwà, bààkenza cinyì? Cyàbò cyà kutwàla cìvwa ànu didyombola, kumutàcishabò, bàmwambilà ne: “Mòna’s, wêwè’s udi mwenzè mpèkaatù, mu musokoko.”

<sup>59</sup> Ki Yobò kushààla ànu kacya wàkwàta. Ùvwa wèla mbilà mikolè. Ùvwa mutwìshìibwe ne ùvwa ùlonda mêtùmà à Nzambì. Ùvwa mwenzè ànu menemene cìvwà Nzambì mulayè bwà kwenza. Cìvwà Nzambì mumulayè aci, bwà ne Yéyè ùvwa mwà kwimana ku luseke lwèndè, mwinshì mwà mulàmbù wà dyosha awu, ne kushààlayèpu.

<sup>60</sup> Pa nànscha, Nzambì wàkamupetesha cikèènà-kumònà. Yéyè ùvwa mupròfetà. Wàkamònà cinyì? Wàkamònà Dîyì, Yesù Kilistò. Kwambayè ne: “Ndi mumanyè ne Mupikudi wanyì ùdi ne mwöyi. Ne ku matùkù à ndekeelu, Yéyè neìmanè pa buloba. Nànscha misàndà yà mu dikobà milbütûle mubidi ewu, kàdi nànscha nànscha mu mubidi wanyì mêmè nêmmonè Nzambì.” Nwamònou’s, Yéyè wàkamupetesha cikèènà-kumònà cyà dibìlkà dyà ku lufù aci. Bu mùvvwàye mupròfetà, wàkamònà Dîyì. Wàkamònà Dîyì ne kumanyayè ne mifùbà yèndè ne mubidi wèndè nebìjuukè cyàkàbìdì mu ditùkù dyà ndekeelu. Bâàkamukonka yéyè ní ùvwa mumanyè mwaba wùvvwà Nzambì, ní ùvwakù ànu mwà kumònà.

<sup>61</sup> Kwambayè ne: “Cilòngò cidi cifwa, cidi cijuuka cyàkàbìdì; mucì wùdi wùpuka, wùdi wùjuuka cyàkàbìdì; kàdi muntu yéyè ùdi ùlààla pansi ne ùkùùla mwoyi, ùdi ùnyanunuka, ùdi penyi? Èyì bu Wéwé kunsokokakù mu lukità, ne kundamakù mu mwaba musokòme too ne pààpità cijì Cyèbè cikolè aci.”

<sup>62</sup> Ki mikungulu kubangayì kukungula, mikenyi kubangayì kupenya, Nyumà wa Mukalenge kwikila Yè muprofeta awu. Ki kujuukilayè kuulu, ne kumònayè Dilwa dyà Mukalenge, ne kwelayè lubìlà lukolè ne: “Ndi mumanyè ne Mupikudi wanyì ùdi ne mwoyi, ne ku matùkù a ndekeelu Yéyè neàmanè pa buloba. Nànscha misàndà yà mu dikòbà mibùtùle mubidi ewu, mu mubidi wànyì mêmè némmonè Nzambi.” Nzambi wàkamupetesha Dìyì, Yesù Kilstò, ki kuMumònayè ne kuMubììkilayè ne m’Mupikudi Wende.

<sup>63</sup> Izalèlè ùvwa dijinga ne njila wa dipàtukila mu Èjiiptì, ki Nzambi kubàpetesha mupròfetà, mupròfetà wâkashìndika Dìyì divwà dilayìibwe kùdì Abraham. Menemene, njila mulongolola wa Nzambi’s! Kabàvwa mwà kulongesha mùsàalaayì kampànda to, kabàvwa mwà kwenza cikampànda, kabàvwa mwà kwenza cikansanga to. Cintu cìmwèpelè cyàkenzàbo cìvwa nkwindila njila mulongolola wa Nzambi. Ki kwamba Yè, wàmba ne: “Ùvvà mwà kùpàtula bantu abu, paanyimà pàà bidimu nkàmà yìnaayi. Cisàmba cyèndè cìvwa mwà kusanganyiibwa mu bupika, kadi Yéyè ùvwa mwà kubàpàtula ne cyanza cikolè. Ùvvwa mwà kuleeja bimanyinu Byèndè ne maalu à kukèma, ne kupeta butùmbi mu ditunga adi.”

<sup>64</sup> Kì muntu awu udi upweka ewu, pààkadilàbo bikolè apu’s! Kàdi mpindyewu vùlukààyi ne, myadi yônsò ayi kayìvwa mwà kubàsùngilakù to, too ne pààkakùmbanà dìbà adi.

<sup>65</sup> Bintu bitùdì tumòna leelù ewu ebi, kabivwaku mwà kwenzeka kùkaadi bidimu makumi àbìdì, anyi kùkaadi bidimu makumi ànaayi to. Ndeelù ewu udicì cyènzèka. Ki dìbà ndyòdì edi’s! Ki cikondo ncyôcì eci! Mpindyewu ngudi cikondo cídici cyûle. Bwà cinyì? Nzambi ngudi mucilayè, kadi’s ki cyôcì eci.

<sup>66</sup> Bààkamba, kùkaadi bidimu lukàmà, ne: “Dibàtiiza dyà Nyumà Mwîmpè kadìvwa mwà kwikalaku cyàkàbìdì to.” Bâàkamba, kùkaadi bidimu makùmi àtaanu ne: “Nyumà Mwîmpè...” Kàdi nwènù beena Mpenta’s nwâkabàjaadikila ne, cìvwa ndìbà dyà Nzambi bwà kupòngolola Nyumà Mwîmpè. Cìvwà ba-Méthodistes, ba-Baptistes, ba-Présbytériens, ba-Luthériens bambè nànscha ciikàle cinyì, nwènù’s nwâkashààla ànu ne Dìyì dyà Nzambi. Bantu bâà bukitù bâàkapàtuka kuntwaku ne kushààlabò ànu kacya bâàkwàta too ne mwâkalwa dibàtiiza dyà Nyumà Mwîmpè, ne bâàkaakula mu myakulu ne kutùmbisha Nzambi. Muntu nànscha umwe kénéa mwà kunwàmbila bishiìlangane to. Nzambi mmudyùmvwijidi wa Yéyè mwinè; nwacipeci. Udi mufwànyìne kwikala kuyi mwà

kucyùmvwija to, kàdi udi mumanyè ne udi naaci. Nganyì udi mwà kuumvwija Nzambì? Muntu nànsha umwe.

<sup>67</sup> Ncyêna mwà kukwambila mùdì Nzambì mwà kuleeja cikèènà-kumònà to, kàdi ndi mumanyè ne cìdi cyènzekà. Ncyêna mwà kuumvwa mùdì Nzambì mwà kwenza bintu ebi to. Kî mbwalu bwànyi bwà kucyùmvwiji to. Yéyè ùdi, mmusòmbè nkààyendè. Yéyè ùdi Elohim, Ewu udi udikùmbana nkààyendè. Mêmè ndi ànu musadidi Wendè cyanàànà. Ndi mumanyè ne m'Mucìlayè, ne ndi mumanyè ne ncyòcì eci kaaba aka. Ki cintu cimwèpelè cîndì mumanyè ncyòcì aci. Ndi mumanyè aci ne, Yéyè ùdi umwèumwè awu makèèlèlè, leelù, too ne kashidi. Ndi mumanyè ne m'Mulayè cyòcì eci, ne Nzambì ùdi mwab'ewu bwà kuvwiija mulayì Wèndè ne mmulelèlè. Eyowà. Njila mulongolola wa Nzambì's!

<sup>68</sup> Izàlèlèlè bâàkamupetesha mupròfetà, wâkashìndika Dîyì awu, ki kubàpàtulabò. Mupròfetà ewu, Môsà, wâkasòmbela mu cipèèla bidimu mulongolongo, bidimu makùmi ànaayi, ùlwangana ne bantu aba, ùteeta bwà kubàlama too ne pàvvwàye mwà kubàfikisha ku buloba bulaya. Kufikabì mu mùshindù wà ne, mutu awu ùvwa ne cyà kufwa; ùkaavwa ne bidimu lukàma ne makùmi àbìdì. Kakùvwa kaaba kàà kufwìlayè to. Pààkafikàye pabwípì ne kufwà, Nzambì wâkamulongolwela Lubwebwe kampànda; Lubwebwe lùvvwàye mutuutè mu cipèèlè alu, Lubwebwe lwàkabàlondà alu, kwàkanwìnàbò mâyi aku. Nzambì wâkamulongolwela Lubwebwe kampànda, mwaba wà kufwìlayè, wùvwa Môsà mwà kufwìla lufù lwà kaneemu.

<sup>69</sup> Pa lwôlò Lubwebwe elu, Nzambì, ndekèlè mfwilèku pa Lubwebwe lumwèlumwè alu! Ki pândì muswè kufwila. Lubwebwe alu lùvwa n'Kilstò Yesù. Èyowà's, mukalenga.

<sup>70</sup> Paanyimà pàà yéyè mananè kufwila pa Lubwebwe alu, wâkakèngela bambudi bâà mushèètè wà bafwè. Ki Nzambi kumutùmina musùmbà wà Banjèlo. Bwà cinyì kî mmutùmè musùmbà wà bakùlù bëndè? Bwalu mutu nànsha umwe kàvvwàkù mwà kumufikisha mwaba wùvvwàye ùya awu to, ànu Banjèlo. Bâàkamwambula too ne mu Bwikadi bwà Nzambì, yéyè ùvwa ùkèngela bambudi bâà mushèètè wà bafwè nènku Nzambì kucìlongolola. Wakaya mùshindù mulongolola wà Nzambì. Àlèluuyah's wè!

<sup>71</sup> Henòkà ùkaavwa mwendè bidimu nkàmà yìtaanu ne Nzambì, ne wàkaMusànkisha. Byàkamukèngela cibeeba cyà kwalukidilayè Kumbèlu. Nzambì kumupeteshaci.

<sup>72</sup> Eliyà ùvwa mwelè Izàbèlè mulawu bwà kwísù kwèndè kulaaba bilaabu aku, ne mùshindù wèndè wùvvwàye mufikishe bantu bônsò ku dyenza maalu awu. Nènku ùkaavwa mucyòke ne muzengèle, ne ùkaavwa pabwípì ne kwalukila Kumbèlu. Ùkaavwa mukùlákàjì be mu mùshindù wà kàciyi mwà kwenda kusabuka Yadènè to; Nzambì kumulongolwela Ye njila wa

kusabukaye Yadènè. Ùvwà ùjinga kubànda mu Dyulu, bwà katuutakeenayè ne Nzambì; Nzambì kutumaYè díkalù dyà mvità dyà kapyà, ne tubalù, e kumwambula. Njila mulongolola wa Nzambì. Njila mulongolola wa Nzambì. Ki cìtuYe wènza misangu yônsò menemene. Cyà bushuwà. Èyowà's, mukalenga. Nzambì útu ulongolola njila, misangu yônsò. Èyowà.

<sup>73</sup> Beena meeji, pàvvwàbo mu njila bâfùmina ku Babùlònà kwàka, bàvwa munkaci mwà kumònà njila uvwabò baswè kupweka nèndè, bwalu bàvwa bamanyè ne bivwa bikèngela bwà Mfùmù ewu àlediibwè. Bàvwa dijinga ne kaleeji-nord; Nzambì kulongololaYè Mùtootò. Bâàkashiya bintu bikwàbò byônsò paanyimà. Kabàvwa dijinga ne tuleeji-nord to; bâàkalonda Mùtootò awu. Ùvwà nnjila mulongolola wa Nzambì. Nzambì wàkalongolola njila kampànda, bôbô kulonda Mùtootò awu too ne mwàkapetàbo Bukénkè bupwàngâne abu. Kaa!

<sup>74</sup> Bâà pa buloba bàvwa bakèngela Musùngidi, ditùkù kampànda. Bâvwa bajimine; kabàvwa bacimanyè to. Bâvwa bêèla meeji ne bàvwa basùngidiibwe, kàdi bìvwa bìbàkèngela Musùngidi. Nzambì kulongololaYè Mwânà wa balùme ne, ki Musùngidi. Bwà cinyì? Muntu mukwàbò nànsha umwe kàvvwakù mwà kucyènza to. Kakùvwa muntu nànsha umwe pa buloba, muntu nànsha umwe mu Dyulu, mwaba nànsha wùmwè, uvwa ukùmbana bwà kucyènza to. Nzambì wàkabwikila virgò kampànda mundidimbì, yéyè kwimita difù ne kulela Mwânà wa Balùme. Kàdi Mwânà wa Balùme awu kàvwa nî mmwena Yudà anyì wa bàà Bisàmbà byà Bèndè to. Yéyè ùvwa Nzambì, mumwèneshiibwe mu mubidi, Umwèpelè uvwa mwà kupikula awu. Mashi Èndè ngàdì àtùsùngilà. Mashi Èndè ngàdì àtwòndopà. Mpa wòwò Mashi awu patudi mwà kwimanyina, bwà mulayì kanà wônsò wùtùYe mufile. Nzambì mmulayè bwà kucyènza.

<sup>75</sup> Nzambì útu ùtwìlangana ne mukuukwidi ànu mu Mashi, ne mwinshi mwà Mashi. Izàlèèlà ùvwa ne mwaba wùmwèpelè wà kutwìlangana ne Nzambì. Kabiyi mu... Nzambì ùdi ne Mwaba wùmwèpelè, leelù ewu, wùdìYe—wùdìYe ùtwìlangana ne mukuukwidi; kí nku ba-Méthodistes, ba-Baptistes, anyì beena Mpenta nànsha. Ùdi ùtwìlangana nendè mwinshi mwà Mashi. Ki mwaba wùmwèpelè mulongolola wùdì Nzambì naawù; kí mmu bulongolodi to, kí mmu nsangilu kampànda to. Kàdi mu Mashi ki mùdì Yesù Kilistò ùtwìlangana ne muMukuukwidi. "Pângààmònà Mashi!" Ki njila mulongolola wa Nzambì nyéyè awu.

<sup>76</sup> Paanyimà pàà èkèleeyìyà mananè kwikalà mutwìshìibwe mu kantu ne kantu, pààkàMumònàbo ne, Yéyè nguvwa Maasiyà awu!

<sup>77</sup> Mukàjì mutekète wa ku ciinà cyà mâyi awu, pààkamukèngelàbi Musùngidi, bìvwa bìmukèngela bwà cintu

kampànda cyà kuleeja. Ùkaavwakù muyààyàaye mu èkèleezìyà ne bikwàbò byônsò, ne bàkaavwa bamònèmòne twitabaayi ewu ne twitabaayi wàwa, mu mùshindù wa ne, yéyè kushàala ne ndumbà. Cyôcì kumutùma mu mùsèsù. Dîngà ditùkù, ùvwa tuyè kasuna mbekeci wa mâyì, lwà pa diba dikùmi ne ùmwè wa mundaamunyà nànku awu, nènku ki Muntu mulùme awu musòmbe mwaba awu; mwena Yudà ewu apa, mu kaaba kaalabale aka. Ki mukàjì awu kwambayè ne . . .

<sup>78</sup> Pààkayàye bwà kupwekesha mbekeci wendè muswikila ku mwonji wà ndòbo, bwà kupeta mâyì awu, kuumvwayè Muntu mulùme wàmba ne: "Mukàjì, Ntwàdilèku mâyì a kunwà." Ki yéyè kwamba . . .

<sup>79</sup> Kukùdimukayè lubilu, ne mwikàle wèla meeji ne Yéyè awu ùvwa ànu mwena Yudà wetù wa pàtupù ewu, bwalu Yéyè ùvwa ànu muntu bwà pà bìdì bìtàngilà mubidi. Yéyè ùvwa Muntu; ùdfa, ùnwa, ulààla tulù, ànu mutùtù twêtù twenza amu. Ùvwa muntu menemene mu mùshindù wà ne Ùvwa mwà kufwà, kàdi Pèndè's ùvwa Nzambì. Pashìshe tudi tusangana ne, pàdì . . .

<sup>80</sup> Yéyè ne "Kacìtu cilèlè bwà nwènù beena Yudà kulòmba beena Sàamaalèyà bintu bu nànku awu to."

<sup>81</sup> Yéyè ne: "Kàdi bu wîkala mumanyè ne mwine ûdì wakula nendè ewu Nganyì, nùnku wêwè's ngudi mundòmbe Mêmè mâyì à kunwà." Yéyè ne: "Ndà kangàtè bàyeebè kàdi ùlwe mwab'ewu."

Yéyè ne: "Ncitu ne bàyaanyi bwalà".

<sup>82</sup> Yéyè ne: "Wambì bulelèlè. Ùkààvwa naabò bàtaanu, kàdi ûdì musòmbe nendè mpindyewu awu kî ngwebè to." Cyàkenzekà ncinyi? Nzambì wàkamulongolwela cintu kampànda.

<sup>83</sup> Awu ne: "Mukalenge, ndi njingulula ne Wêwè ewu udi mupròfetà. Tudi bamanyè ne pààlwà Maasìyà, Yéyè neàtwàmbilè maalu aa. Ki cyènzà Ye ncyôcì aci. Ki cidi Dîyì dyàmba. Ki citùdì bindile. Mêmè ndi ngumvwa ku mwoyi kùngenda ne mucyòke bwà bintàkanyì byônsò ebi, twitabààyi yàbò ayi ne bikwàbò, Bâfaalésà, Basadokà, ne beena Helôòdè, cyônsò cìdibi bifwanyine kwikala aci. Kàdi tudi bamanyè ne Maasìyà kampànda ùlwalwa, pààlwà Ye apu. Udi Wêwè wamba bìshi bwà bwalu abu?"

<sup>84</sup> Kwamba Yè ne: "Ndi Yéyè awu." Amen! Nzambì ùvwa mulongòlòle njila. Ki kushiyayè mulòndò wa mâyì awu, mukàjì mushintùlùke, ne kubwelayè lubilu mu cimenga, wàmba ne: "Lwâyi, kanùmonààyi Muntu Udi mungambile bintu bìndì mwenzè. Ewu kí m'Maasìyà awu anyì?"

<sup>85</sup> Peetèlò, munkaci mwà kutèèleja bwalu bùwà Andèlè ùlonda, ne misangu yàbûngì yìvwàye mutèèlejètèèleje, muumvwè Andèlè wàmba mùvwà Yone ùleeja Maasìyà kùdi bantu, pèndè Muntu's, ne bintu byônsò bìvvà munkaci mwà kwenzeka ebi. Bwà Peetèlò

byônsò abi bìvwa bwalu-busokoka. Kàdi díngà ditùkù kulwayè ne Andèlè, bwà kumònà Yesù. Nènku mmwenzè ànu ùbwela mu Bwikadi bwà Yesù anyì, Yesù kumutàngila Yè, è kwamba Yè ne: “Dînà dyèbè n’Simonà, ne udi mwânà wa Yona.” Nzambì ùvwa mulongòlôle njila bwà Peetèlò kumònayè ne Yéyè ùvwa Nganyì. Ùvwa m’Maasiyà awu.

<sup>86</sup> Mpindyewu tudi tujandula ne, paanyimà pàà Yesù mananè kufwà, ne mubànde mu Dyulu, Èkèleeziyà ùvwa ùkèngela Bukolè, bwà kufila bujaadiki. Nzambì wàkabàpèèsha Mpenta. Wakalongolola Mpenta.

<sup>87</sup> Bidimu binunu bìbìdì byápici, balunda bàànyì. Bidimu binunu bìbìdì mbyebi byápici. Mu matùkù a ndekeelu aa, tukààdi bakafika too, muntu ùkaadi mubwelè mu ndongolwelu wa bwena Kilistò ne muCinyangàkàje cyàkàbìdì, muCisopàkàje cilwè twitàbààyì, maèkèleeziyà, màngumba, miyiikì yà mamanya à mu mitù, mu müşhindù wà Bukolè ne cintu cilelèlè cyà Èvànjeeliyò wa Kilistò byumbè bijimìnne pàmwè ne byônsò. Nènku’s ki twétù aba ne Dîyì dilaya bwà matùkù a ndekeelu aa, cììkalà mwà kwenzeka, cììkalà mwà kwenzeka aci; muntu kéné ùDìitabuuja to. Bákàadi buumùkeKù. Paùdì umukonka nî mmwena Kilistò; ùdi wàmба ne: “Mémè ndi mwena cikampàndà.” Aci kacyèna ne cìdici cyùmvwija to. Bikèngela wìkalè mwena Kilistò ku dilediibwa. Mpindyewu tukààdi cyàkàbìdì babwejè cintu cyònsò nkòòng mu Baabùlònà, paanyimà pàà bidimu binunu bìbìdì.

<sup>88</sup> Èkèleeziyà leelù ewu ùdi ùkèngela Bukolè ne Bulelèlè, cyàkàbìdì. Kaa! Nzambì wàkabiìsha Mwan’Èndè ku lufù, bwà eci kutàbalediwbaci, bwalu Wàkamba ne: “Katancì kakesè aka bàà pa buloba kabààkuMmònà kàbìdì to; kàdi nwénù nenùMmònè, bwalu Nêngììkalè neenù, munda mwénù mene.” Tudi tusangana, mu Ebèlù 13.8 ne: “Yéyè ùdi umwéumwè awu makèèlèlè, leelù, too ne kashidi.”

<sup>89</sup> Tudi tusanganaa, mu Maalàkì 4 ne, Yéyè mmutùlayè Mukenji mu matùkù à ndekeelu, uvwa mwà “kwalujulula Diitabuuja dyà bantu kùdì baataatù.” Yéyè ngwâkacilaya, mu matùkù a ndekeelu.

<sup>90</sup> Wàkalaya kàbìdì, mu Yone 14.12 ne: “Ewu udi ungiitabuuja Mémè, byenzedi bìNdì ngenza neàbyéñzè pèndè. Byàbùngì mene bipìte ebi, anyì binènè bipìte ebi, neàbyéñzè, bwalu Ndi nya ku Taatù Wanyì.”

<sup>91</sup> Ùvwa wàkula ditùkù kampàndà. Kwambabò ne: “Mulongeshi, tulèèje cimanyinu.”

<sup>92</sup> Yéyè ne: “Lukòngò lwà butekètè ne beena masandi lùdi lwènda lùkèbangana ne cimanyinu.” Ki mu lukòngò lutùdì ne mwoyi leelù ewu alu. Yéyè ne: “Nènku Nêmbàpèèshè cimanyinu. Bwalu ànu mùvwa Yona mu difù dyà mushipa wa bàlenà, munda mwà matùkù àsàtù à muunyà ne à bufukù, ki müdi kàbìdì

Mwânà wa muntu ne cyà kwikala mu mwoyi wà buloba, matùkù asatu à muunyà ne à bufukù.”

<sup>93</sup> Ncimanyinu cyà mùshindù kaayì cìdì lukòngò lwà beena lwonji ne beena masandi bafwànyìne kujandula? Cimanyinu cyà dibìikà dyà ku lufù. Nènku ki cìdì citùlaya leelù ewu, cimanyinu cyà dibìikà dyà ku lufù cyà ne Yéyè ùcìdi ànu ne mwoyi, Yéyè udi umwèumwè awu makèèlèlè, leelù, too ne kashidi.

<sup>94</sup> Yéyè ne: “Ànu mwàkadìbi mu matùkù a Lotà,” bu mutwâcìkenkèci makèèlèlè dilòòlò awu. “Matùkù a Lotà, cyàkenzekà mu matùkù a Lotà aci, ki mwikalàbi kàbìdì ku dilwa dyà Mwânà wa muntu.” Bintu bìdi bitùlaya ebi, Mifündu mikwàbò yàbûngì. Bwà kubènga kupìcisha dìbà... “Katancì kakesè bàà pa buloba kabààkuMmóna kàbìdì to. *Kosmos*, ‘ndongolwelu, cikondo cyà èkèleeyìyà,’ kabààkuMmóna kàbìdì to. Kàdi nwênu nenùMmònè, bwalu Nêngìkalè neenù, munda mwènu mene, too ne ku ndekeelu kwà cikondo.” “Yesù Kilistò umwèumwè awu makèèlèlè, leelù, too ne kashidi.” Ncinyì ciinè aci? Ncimanyinu cilongolola cyà Nzambì, njila mulongolola wa Nzambì.

<sup>95</sup> Abraham munkaci mwà kwindila mwânà wa balùme. Cimanyinu cyà ndekeelu cyàkamònaye kumpàlè kwà kabùtù kàà bàà Bisàmbà byà bendè, civwà n’Nzambì mumwènèshìlbwe mu mubidi wà buntu, wàkamanya mìnsokontù yà mu mwoyi wà Sarah pàvvwàye mu ntentà apu awu. Yesù wàkamba ne: “Aci necìpinganè cyàkabìdì ku dilwa dyà Mwânà wa muntu.” Mwanèétu wa balùme, mwanèétu wa bakajì, ndi mêmè ngiitabuuja ne tudi ne mwoyi mu ditùkù adi. Mêmè ndi ngiitabuuja ne edi ki ditùkù dyà mulayi adi.

<sup>96</sup> Bikèngela wìkalè ne diitabuuja mu cyûdì wenza. Wêwè kùyi ne diitabuuja to, pawìkala ücyàngata ànu ku didicinkila cyanàànà... Mwakù *kudicinkila*, bilondèshile Webster, ùdi ùmvwija ne, “kudyèla mu bwalu bwà njiwù kùyi ne dyanyisha to.” Kàdi pàdì Dìyì dicìlaya, ne Nzambì wìmana paanyimà pàà Dìyì adi, kwêna udicinkila kàbìdì to. Udi wenza ànu menemene cìdì Nzambì mwambè bwà kwenza, ne Yéyè mmwena dibànza dyà kuCítwa nyama ku mikòlò.

<sup>97</sup> Mwenji wa-wa matàbuluja, mumanya bîmpè, kùkaadi bidimu byàbûngì, ngâkamumònà pâncìvvà mwânà mukesè, ûvwa m’Paul Rader. Wàkalonda bwalu kampànda, díngà ditùkù, bütù bundamàte misangu yônsò. Yéyè ne: “Díngà ditùkù, tuvwa tukosa nkunyi.” Yeyé ûvwa mukòsolodi wa micì, mu Oregon mwàmwa, ki yéyè ne mfùmwèndè wa mudimu kumwambilayè bwà kubàndàye ku lusongo lwà kakùnà. Ùvwa munkaci mwà kulòòta. Kùvwàye usanganyiibwa mu bulelèlè, mwinè musangu awu, ûvwa mu bisanga; ki kusaamayè mubidi kapyà, wèbè wà ngwengwengwe awu’s, nènku ûvwa ùpunga ne lufù.

Kuyabò kakèba ngàngàbukà kampànda, kàdi cìvwa ntàntà wa maakilomèètà ne maakilomèètà, bayè mu bwâtù bwà diita.

<sup>98</sup> Kumpàla kwà ngàngàbukà kukùfikayè, Paul kubangayè wenda ùfwatalala, ùtâmba kusaama. Ki kubììkilayè mukàjèndè wa lulamatu awu. Kwambayè ne: “Munanga wanyì, mu cibambalu emu mùdi mwènda mùfiika, mùtâmba kufiika, byènda bibwita.” Ki ùmbà ùbwela mu kòmâ.

<sup>99</sup> Dyà ùbwela mu kòmâ nùnku, kwambayè ne wàkalòòta, pàvwâye mu kòmâ apu ne, mfùmwèndè wa mudimu kumutumayè bwà àkakòsè mucì kampànda. Kusanganayè mucì awu, kuupulayè mucì awu, kupàyikayèmu kasuuyi kèndè, ne kwololayè byanza bwà kuwàmbùla. Kàvwa ànu mwà kuwùjuula pansi to. Kwambayè ne dikàndà dyèndè dìvwa dikeèpèle. Kàvwa ànu mwà kuwàmbùla to. Yéyè ne: “Bunènè bwônsò bùdì mucì awu abu, ncyà bushùwà ne mêmè ndi mwà kuwàmbula. Nganjìbi kuteeta cyàkàbìdì.” Ki kupwekelelayè è kujuulayè, kukwàtayè ànu mudimu mukolè too ne mwàkazengelàye. Kusòmbelayè pansi ku luseke lwà mucì awu, kwambayè ne: “Ncyénà ànu mumanyè cîngènzà to. Mfùmwanyì wa mudimu pèndè's ùdi ùlòmba bwà kupweka ne mucì ewu ku citùùdilu kwàka, eku mêmè pàànyì mutàmbe kuteketa bwà kupweka naawù.”

<sup>100</sup> Kwambayè ne wàkùmvwa Dìyì ditàmbe kwikala dyà kalolo dikààvwàyekù mumvwè, ùvwa mmfumwèndè wa mudimu uvwa wakula; kàdi yéyè ne, pààkakùdimukàye bwà kumònà ne mfumwèndè wa mudimu awu ùvwa nganyì, ùvwa m'Mukalenge Yesù. KwambaYé ne: “Paul, cyûdì ulwangeena nànku ncinyì? Cyûdì ulubakeena nunku ncinyì? Udi umône mâyì àdì àpwekà kwàka àa anyì?” Yéyè ne: “Bwà cinyì kùyi ànu wela citùpà cyà mucì aci mu musulu amu, ne kupweka naaci mubàndepù? Pweka mubàndepù too ne ku citùùdilu.”

<sup>101</sup> Kutùpikilayè pa citùpà cyà mucì aci è kubangayè kupwekela pamutù pàà mavwala à bijèngù awu, wènda wèla mbìlì mikolè ne dìyì dinàngula. “Ndi mubàndepù! Ndi mubàndepù!”

<sup>102</sup> Mwanèètù wa balùme, mwanèètù wa bakajì, Yesù Kilistò wàkalaya ne bintu ebi nebyènzekè mu matùkù a ndekeelu. Ndi ngiitabuuja ne ki kutùdì ne mwoyi eku. Ndi ngiitabuuja ne Yéyè ùdi umwèumwè awu makèèlèlè, leelù, too ne kashidi. Mêmè ncyéna mumanyè mudìbi byenzèke to, kàdi ndi ngenda mubàndePù. Ndi ngiitabuuja ne Cidi Bulelèlè, bwalu Ng'Èvànjeeliyò, njila mulongolola wa Nzambì. Ndi ngiitabuuja ne m'Mukenji wà dìbà edi, cikondo citùdì ne mwoyi eci. Nnjila mulongolola wa Nzambì. Ndi mubàndePù!

Kanwènaayikù baswè bwà kutùpikilapù pàmwè naanyì, patùdì twinyika mitù yètù apa anyì?

<sup>103</sup> Taatù wa mu Dyulu, tudi tubwela mu Butùmbi babànde pa Dìyì Dyèbè. Tudi twitabuuja ne Dìyì Dyèbè dìdi Bulelèlè. Èyì

Nzambì, swàku bwà mulùme yônsò ne mukàjì yônsò, dilòlò edi, bàbandè pa Dìyì, ne bayùlukè ne, pàdìbo bënda bápweka mu lwendu apu, bádi mwà kujikula ne: "Ndi mubànde pa mulayì wà Nzambì. Newùkambwejè buludì mu Butùmbi. Kí njila udì Nzambì mundongòlwèle leelù ewu nyêyè awu. 'Yesù Kilistò umwèumwè awu makèèlèlè, leelù, too ne kashidi.'"

<sup>104</sup> Wêwè wâkamba ne: "Katancì kakesè bàà pa buloba kabâàkuMmònà kàbìdì to, kàdi nwêñù nenùMmònè; bwalu Nêngììkalè neenù, munda mwèñù mene." Wêwè utu mutùlayè, Mukalenge, ne netùKumònè.

<sup>105</sup> Beena Ngèlikà bààkalwa, musangu kampànda, kwambabòò ne: "Bakalenge, tudi baswè kumònà Yesù." Nénku bôbô bààkapèeshiibwa dyésè adi. Nénku dilòòlò edi, Mukalenge, tudi baswè kuKumònà, twêtù pèètù. Ki dijinga dyà myoyi yèù. Muntu nànsha umwe kêna mwà kuumvwa bwalu Bwebè, kayi ùjinga kuKumònà to. Pashìshe piikalàbi ne beena Ngèlikà aba bààkaanyishiibwa bwà kuKumònabò, ne Wêwè kutulongolwela njila bwà twêtù kuKumònà, Wêwè utu misangu yônsò ànu upenga njila bwalu Udi umwèumwè awu makèèlèlè, leelù, too ne kashidi. Musadidi kampànda wàkabweja beena Ngèlikà aba mu Bwikadi Bwèbè, nénku kufikabò ku diKumònà. Tùpèeshèku dyésè dìmwdimwè adi dilòòlò edi, Taatù. Swàku bwà twêtù, bu basadidi, tufikishè batèèleji aba mu Bwikadi Bwèbè. Nénku swàku bwà tùmonè Yesù, dilòòlò edi, Yéyè udi umwèumwè awu makèèlèlè, leelù, too ne kashidi. Enzàku nànku, Mukalenge.

<sup>106</sup> SÙngilàku bajimìne, Mukalenge, ní kùdiku mulùme, mukàjì, mwânà wa balùme, anyì wa bakàjì. Patùdì tumònà ditùngà dyètù dikooyìke bikolè ne bashebeyanganyi ne bakòshhanganyi baà miminu, ne bantu bakònàyàngàle, ne pa kumònà dinyanguka mu ditùngà leelù ewu's! Ne pa kumònà dinyanguka mu maékèleziyà, ne kubàmònà bàlombolangana ku cishipeelu cyà nsangilu wa èkèleeziyà wa buloba bujimà kuntu kwàka, mbwalu kabèéna bàlonda njila mulongolola wa Nzambì to! Bàdi bàlonda njila wa twitàbabààyi kampànda pamutù pàà kulwila ku Dìyì.

<sup>107</sup> Nzambi, tudi tulòmba bwà beena Kilstò balelèlà, bashùwashùwàle, balediùbwé cyàkàbìdì, bu mungacileejì mucifwànyikijilu, mu kwikala mabata malelèlà, bôbò... “Mikòòkò Yànyì yìdi yùmvwa Díyì Dyànyì, kayààkulonda mwenyi nànsha.” Mukalenge, Díyì dyà mukana Mwèbè n’Díyì. Aci ncitù misangu yônsò ànu njila Webè mulongolola bwà Èkèleeyiyà ne bwà bantu, n’Díyì Dyèbè. “Díyì Dyèbè m’Bulelèlà.” Ne Wewè udi Díyì. Ne Bible údi ûtwàmbila ne: “Díyì dyà Nzambi nditwè kutàmbaa mwele wà mvità musàkisha nseke yìbìdì, dijinguludi dya meeji ne mapàngadika à mu mwovi.”

<sup>108</sup> Bwà cinyì Izálèèlà kàvwakù mwà kumònà Maasiyà wabò, pààkamònàbo ne Yéyè ùvvwa Díyi adi, pàvwà Ye mwà kujingulula meeji àvwà mu mwovi wàbò apu? Bwà cinyì kabààkamònà?

S'bààkacyùmvwila ku bapròfetà, bwà ne bapròfetà bàvwa mwà kucyènza; kàdi pààkavwijiibwà kaabujimà kàà Nzambì mu Mwân'Endè, ne Yéyè kwikala ne mwoyi munkaci mwètù, pashiishe kupangabò kucimònà bwalu bàvwa bafofòmìjìibwe.

<sup>109</sup> Mukalenge, aba bàdì ne mêsù àbò matàbàlè, dilòòlò edi abu, swàku bwà tûmonè Yesù munkaci mwètù. Swàku bwà mubèèdì yônsò òndopiibwè. Swàku bwà eci cikosè bwalu, Mukalenge, bwà kashidi kààbò, kàbìdì, kuumukila ànu ku díbà edi... kabènji cîngà cintu ànu kwitabuuja ne Wéwè ki Maasiyà awu. Bâdi bàlwa biikàlè bâlonda njila wa Nzambì. Bâàbûngì bàà kùdibo bàdi mwab'ewu, dilòòlò edi, bìkàlà pàmwàpa kabàyi mwà kwikala kaaba aka lumingu kuumukila ku leelù ewu to, bu Wéwè, dikwàcisha Dyèbè dyôdì kadìyi dilwè to.

<sup>110</sup> Mpindyewu, Taatù, Wéwè ùdi mwambùle bujitu ànu bwà Cyûdì mulayè. Kàdi Wâkalaya cyà bushùwà ne twètù netùKumòne. Wâkalaya ne ciwàkenzà Wéwè netùcyénzè pètù. Ki díbà ndyôdì edi. Nyewù ngaacijikulu; ndi nciìtabuuja. Nkààdi muKuumvwè wamba nànkù; Dîyì Dyèbè dìdì dyàmba nànkù. Wéwè ucishindika. Ndi mumanyè ne ncilelèlà. Mpindyewu cimanyiibwèku, Mukalenge. Ncifundìibwe, mpindyewu swàku cyènzekè, bwà bwalu bwà Bukalenge bwà Nzambì. Amen.

<sup>111</sup> Ncyéna ngeela meeji ne netùbiikilè mulongo wà babèèdì to. Ngeela meeji ne nênkwatè naaci mudimu ànu kumuukila mwab'ewu mene.

<sup>112</sup> Mbanganyì bàà kunùdì aku bàdì bàsaama? Mpindyewu swàyikù... Ùdi mulamè cyanza cyèbè, ujaadika ne udi usaama.

<sup>113</sup> Mbanganyì bàà kunùdì bàdì baswè kufila bujaadiki mùshindù wùmwèwùmwè awu ne: "Mwanèètù Branham, ncyà bushùwà ne mêmè ncyéna musùngidìibwe to"? Udkìù mwà kwela cyanza muulu ne: "Nsambìdilèku" anyi? Nzambì akubènèshè, wéwè. Abi mbîmpè. Aci cidi... Nzambì akubènèshè. "Mêmè ncyéna musùngidìibwe to."

<sup>114</sup> Mpindyewu, nwénù bëdì byanza muulu, ne nwénù bàdì kabàyi beelè abu: "Kàdi, Mwanèètù Branham, cyà bulelèlè ndi muswè kwikala musùngidìibwe. Ki cìdì mu mwoyi wànyì. Ndi ngiitabuuja ne kakwèna cintu nànscha cìmwè cìdì cishaàèle bwà mutu kampàndà nànscha umwe pa buloba to." Ncinyì cikwàbò, ncinyì cyûdiku mufwànyìne kukumbaja, cìdì cifwànyìne kwikala cinène kutàmba lupàndù lwèbè? "Nsambìdilèku. Ndi muswè kusùngidìibwa." Udkìù mwà kwela cyanza muulu, mu citanda cijimà emu anyi, mwaba wônsò nàka ne: "Ndi muswè...?"

<sup>115</sup> Mbanganyì bàà kunùdì bâtù kabàyi banjì kupeta Nyumà Mwîmpè, bâmbè ne: "Ndi mumanyè ne ndi ne cyà kuMupeta"? Elàayi byanza byènù muulu. "Ncyéna Nendè to; ndi muswè kuMupeta." Eyo, kùdi bûngì buvùmvùka bàdì kabàyi banjì kuMupete's.

<sup>116</sup> Mpindyewu, Kilistò ùtu ûshààla mukwàte ku Dîyì Dyèndè, kàdi bìdi bìnùkèngela kulama diitabuuja dyènù mu Yéyè. Yéyè ùdi Dîyì. Mpindyewu, Ebèlù nshapità mwi4, mmwambè ne: “Dîyì dyà Nzambì,” dìdì Kilistò adi’s. Kilistò ùdi Dîyì. Nwènù bônsò nudi bamanyè nànkú anyì? Ambààyi ne: “Amen.” [Disangisha dìdi dyàmba ne: “Amen.”—Muf.] Yéyè ùdi Dîyì, “umwèumwè awu makèèlèlè, leelù, too ne kashidi.” Cìvwàye mu Môssà aci, ncìvwà Ye kàbidì mu Elìyà; cìvwà Ye mu Elìyà aci, ncìvwà Ye mu Yone; cìvwà Ye mu Yone aci, Wàkadìkùmbajila Yéyè mwinè mu—mu Yesù. Ne leelù ewu Yéyè ùdi umwèumwè awu ànu mùvvwà Ye musangu awu amu, ne Cicìdi ànu Dîyì dyà Nzambì dyamba mu cipròfetà bwà ditùkù edi, cìdì cyenza ne Yéyè ikalè Bukénkè bùdì bùkenkeshà ne bùshìndika Dîyì dilaya.

<sup>117</sup> Tukaàdi ku cikondo cyà nshììkidilu, nwènù balundà bàànyì. Yesù ùdi kaaba aka. Ndi mumanyè ne nukààdi bumvwè cyôcì aci.

<sup>118</sup> Ambàbi tûng bu ne kacya kùtukù mwanjì kumònà, kacya bààkulela, ne kuyikù mupetè cyumvwilu cyà lumònù, muntu nànscha umwe kàyi naacì to, kàdi ku musangu ne ku musangu wéwè umvwa luuyà lukolè menemene? Kàdi eku mêmè mwikàle ne lumònù kampànda, mwikàle mwà kumònà, ne mufwànyìne kukwambila ne cìvwa n'dibà. Wéwè wamba ne: “Ncyéna mumanyè mùdibi byènzekà to, kàdi ndi nguumvwa cintu, cyenzè bu luuyà nànkú, mûdì wéwè mwà kuumvwa amu.”

Mêmè ne: “Kàdi’s ki dîbà ndyôdì adi.”

“Dîbà ki cinyì?”

“S’mbukénkè kampànda.”

“Bukénkè ki cinyì?” Ncifwànyìne cyônsò aci kwuikala buloba bupyabùpyà kûdì wéwè.

<sup>119</sup> Kàdi bu mêmè mwà kunwàmbila ne Yesù Kilistò mmwimàne mwaba ewu mpindyewu? Kàdi bu mêmè mwà kunwàmbila ne Yéyè ùdi munkaci mwètù emu? Yéyè ngudi mucìlayè. “Mwaba wônsò wùdì bàbidì anyì bàsàtù badìsangìshe mu Dînà Dyànyì, Mêmè ndi munkaci mwàbò. S’ki Mêmè ewu!” Mpindyewu aci cìdi anyì Bulelèlè, kûndì mêmè, Eci cìdi cyônsò Bulelèlè, anyì kaCyéna Bulelèlè mu kantu nànscha kàmwè to. Eci cìdi anyì cyà Bushùwà, anyì kí ncyà bushùwà to.

<sup>120</sup> Mpindyewu, bwà bìdì bìtàngilà kukuṣùngila wéwè, Yéyè ngwákenza aci pààkafwà Ye ku Kàlvariyyò apu. Kukwondopa, Yéyè wákacyènza pààkafwà Ye ku Kàlvariyyò. Wéwè itàbuuja cyôcì aci. Dìyì ndyambè ne Yéyè wákacyènza.

<sup>121</sup> Mpindyewu cintu cìmwèpelè cìdì Ye mufwànyìne kwenza, bu ne Üvwa mwimàne kaaba aka muvvwàle—muvvwàle nkooci ewu, udi Ye mumpèèshe ewu, ncifwànyìne kwikalà ànu kukujaadikila ne Yéyè ngudi Maasiyà.

<sup>122</sup> Kî nku bibangu byà mputà yà misonso mu cyanza Cyèndè nànscha. Mwena lubombo kanà yônsò ewu ùdi mwà kwenza

aci, kwenza bibangu byà misonso, ne mashi kwísù kwèndè, ne bimanyinu ne bikwàbò. Aci cìdi mwà kwenjiibwa. Aci cìkaadikù cyenzékènzhèke. Bantu bààbûngì bàkaadi mene beedìibwe ku nkùrusè bu Yéyè. Kí ng'aci to.

<sup>123</sup> Kàdi Mwoyi Wèndè, cìvwà munda Mwèndè aci! “Mwânà kêna mwà kwenza cintu nànsha cimwè to, mu Yéyè mwinè, ànu cìdìYe ùmôna Taatù wènza.” Mwoyi wùdi munda Mwèndè, ki wùvvà wùjaadikà. Cìvwà cifikishe mukàjì mukesè wa ku ciinà cyà mâyi awu ku diitabuuja ne Yéyè ùvwa Maasiyà awu ki mbwalu Yéyè ùvwa mwena Yudà to; mbwalu Yéyè ùvwa mwà kujingulula meeji àvwa munda mwà mwoyi wèndè, ki cyàkenzà ne Yéyè ikalè Maasiyà. Piìkalàbi ne mùshindù awu ngwàkaDileejà Maasiyà mu matùkù à kale wàwa awu, ki cìvwà njila Wendè mulongolola bwà kuDimanyisha ncyaci. Ki cìdi njila Wendè mulongolola, bilondèshile Mifundu, bwà cikondo eci. Nudi nwitatuuja nànkú anyì?

<sup>124</sup> Mpindyewu, yónsò wa kunùdì mwab’ewu, mêmè ndi mwenyi. Ngakènzakanyi, ncyêna mmòna muntu ûndìku mumanyè to. Bantu bônsò mwab’ewu, bâdì kabàyi bammanyè abu, ne bamanyè ne ncyéna mumanyè kantu nànsha kàmwè pa bîdì bìnùtàngila, elààyi byanza byènù muulu. Nkacya ànu byàmònangana’s, myaba yónsò. Muntu udi mulààdika apa pa kalaàlù kàà dibùnya aka ewu, mmwelè cyanza muulu. Kàvwa mummanyè to. Muntu nànsha umwe kí mmummanyè to.

<sup>125</sup> Kàdi vùlukà ne, Nzambì mmukumanyè. Nzambì mmukumanyè. Mpindyewu, Yéyè mujaadike ne Üdi kaaba aka.

“Ncinyì ciinè aci, Mwanèètù Branham?” Ndipà kampànda.

<sup>126</sup> Dipà ncinyì? Dipà ncinyì’s, twamb’eku twamb’eku? Kí nkwangata cintu kampànda ne kukwàta mudimu ne cintu kampànda, kwamba ne: “Ndi ne dipà dyà dyondopa! Ntu mpàtuka ne ngondopa *ewu*, ngondopa *wàwa*” to. Bu ne mvwà mwà kucyènza, ncyà bushùwàu mvwa mwà kucyènza. Mpindyewu, kàdi, dipà, nènku nudi—nudi... Nudi numvwa dipà bibì’s. *Dipà* didì ànu “kudyùmusha wêwè mwinè mu njila kàdi kulekela Nyumà Mwîmpè ùkwàta neebè mudimu’s.” Nwamònú anyì? Ki dipà ndyôdì adi.

<sup>127</sup> Ki cìdi mwambi ncyôci aci. Kàtu ùyiisha cìdìye muswè kuyiisha to. Üdi ùdyùmusha ànu mu njila, ki dipà ndyadì, ne disonsodiibwa dilwa, nènku yéyè—yéyè wàkula ku disonsodiibwa dyà Nyumà Mwîmpè. Dipà dikwàbò kanà dyônsò didi mùshindù wùmwèwùmwè awu. Mpindyewu, mapà a bwambi, ne bikwabo, ki mutubi’s. Kùdi, dyàmbedi, mapà mafila kùdi Nzambì, àdi, “kumpàla bàpostòlò, baprófetà, balongeshi, bampaasàtà, ne batangadiki.” Ki midimu nyôyi ayi. Ki mapà ètù ngôwò awu.

<sup>128</sup> Mpindyewu, Yesù Kilistò wàkalaya ne Yéyè neéñzè cyôci eci mu matùkù a ndekeelu. Yéyè ùcyènza, Yéyè ùlaya ne

mucyenzè, mbanganyì bààMwitabujà ne bààMwitàbà, dilòòlò edi? Elà cyanza muulu, wàmbè ne: “NêmMwitàbè.” Mbanganyì mwab’ewu dîbà adi... Twasàkidilaayi. Mbanganyì mwab’ewu bâtu kacya kabàyikù banjì kubwela nànsha mu dîmwè dyà ku masangisha kwônso eku, elààyi byanza muulu. Ekèlekèle, pàmwè ne cyàbìbìdì cyà musùmbà ewu. Mbanganyì bâdì bìitabuuya, kumpàla kwà Yéyè kucyènza, nwitabuuya nànsha bishi? Nzambì ànùbènèshè.

<sup>129</sup> Mpindiyewu tàngilaayi. Pìikalàbi ne ndi munwàmbile Bulelèlà, Nzambì mmwenzèjìibwe bwà kungandamuna. NeÀngandàmùnè. Ùdi ùtèèka Mèyì Èndè mukana mwèbè ne Wôwò àngata mubidi. Ncyà bushùwà, M'Mèyì Èndè, Cìdi ne cyà kwenza nànkú. “Ngâtumu Dîyì Dyànyì, kaDyàkupingana kadìyi ne cìdìDi dyenzè to.”

<sup>130</sup> Mpindiyewu, bu ne mêmè mvwa mwà kwondopa, mvw'a kucyènza. Ånu bu wa kuneemekiibwa, mufwe wetù, Mwanèètù Upshaw mwena bwalu butùvwà tulonda abu awu. Mukùlumpè awu musòmbe mu ndekeelu mwàmwa mu dìkalù dyà balèma adi, mukùlakàjì wa bukitù awu, mvw'a kwikala mumwondòpè bu ne mvwa ne mùshindù. Nkààvwa ngenda nguumuka pa cibùmbà cyà ku cyambilu, bwà kwamba menemene, ki mêmè kukùdimuka e kumumònà mu cìkèènà-kumònà, uya, wèndela kuulu. Mêmè kumubììkila, kumwambila cìvvà bwalu, ne ki mùvvwàbi. Kujuukayè e kwenda, kufikayè pa cibùmbà cyà ku cyambilu, kulengayè bânà bëndè bàà nkàsà, paanyimà pàà mucibùkile pansi munda mwà bidimu makùmi àsambòmbò ne bìsambòmbò. Nwamònú anyì?

<sup>131</sup> Dilòòlò dimwèdimwè adi, inâbànzà kampànda wa bafiìke, mwikàlé ne mwanèndè wa mu dibòko, kwinshi ku luseke kwàka. Mêmè kwamba ne: “Ndi mmònà ngà–ngàngàbukà muvwàle bìnètè, ne—ne mmupandè mwânà wa bakàjì mukesè, wa bafiìke, kàdi ncimutekèshe mubidi kubangila pa muminu.”

<sup>132</sup> Mukàjì mukùlumpè wà bafiìke, kùyikù mufwànyìne kumuumusha pa cibùmbà cyà ku cyambilu apu to. Yéyè kwamba ne: “Mukalenge, luse, s'mmwanàànyì awu!” Ki yéyè ulwàlwà ewu, musùmbà wa baawisiyê kabàyiku nànsha mwà kukòokesha kumulama to.

<sup>133</sup> Mêmè kwamba ne: “Tàntinè, kabyàkwikala ne dikwàcisha bwà kubànda kùneeku to. Kí... Awu n'Nzambì.” Mêmè ne: “Kabyàkwikala ne dikwàcisha bwà wêwè kulwa apa to. Itàbùujà ànu cyanàànà.” Kí kudyèlaye ku binù ne kubangayè kusambila. Mêmè kutàngila mu batèèleji amu ne kumònà, cyenzè bu kajila, kènda kàya. Mêmè kumònà mwânà wa bakàjì mukesè wa bafiìke mwikàlé ne ciipòpì mu mabòko, wènda ùpwekela mu kajila amu. Ki mêmè kutàngila kânà kakesè, kàà bakàjì kàà bafiìke aku, ngeela mêsù paanyimà, ne kàvwa nkôkò kàmwèkàmwè aku.

Mémè ne: "Cyàndàmùnyìibù." Kujuukaye kuulu, e kuumukayè mu kalààlù kàà babèèdì aku. Nwamònu anyì?

<sup>134</sup> N'Nzambi's. Nwamònù anyì? N'Nzambi. Nwamònù anyì? Yéyè kéné mwà . . . Muntu nànsha umwe kéné mwà kwondopa to. Ndiitabuuja dyèbè mu Nzambi.

<sup>135</sup> Mpindyewu, Bible mmwambè, ne: "Yéyè ùdi Mwakwidi Munènè, mpindyewu mene, udi mwà kulengiibwa ku dyumvwa dyà mateketa ètù." Nudi nwitabuuja nanku anyì? Mwakwidi Munènè! Mpindyewu, pììkalàYe Mwakwidi Munènè, mMufwànyìne kwenza munyì? Pììkalàbi ne Yéyè ùdi umwèumwè awu makeèlèlè, leelù, too ne kashidi, Yéye's mmufwànyìne kwenza byà mwomùmwè makèlèlè, leelù, too ne kashidi.

<sup>136</sup> Mpindyewu sambìlaayi, ne lekèelaayi Nyumà Mwîmpè dîbà adi... Ambilà Nzambì ne: "Nzambì, muntu udi mwimâne pààpa wàwa kí mmummanyè to, kàdi cidiYe Yéyè wàmба ncidì cyùmwika cyà meeji. Wêwè udi umwèumwè awu. Udi Kilistò. Mêmè ndi nsaama. Ndi ne dijinga. Ne bu Wêwè mwà kundekela anyì... Pângìikalà ncìyi ne diitabuua dyà kucyènza to, enzàku bwà muntu kampànda ûndì mumanyè àpetè yéyè diitabuua, ne swàku cììkalè... Bìikilàku ne enzàku bwà—bwà—bwà mêmè anyì muntu awu kulengayè luzemba lwà Civwàlù Cyèbè mu Butumbì. Pashìishe piìkalabi ne muntu wàwa mmuumùke mu njila, dîba adi Wêwè ùkwatè mudimu ne mukana mwèndè bwà kwandamuna, nènku wènzè ànu mùshindù wùmwèumwè wuWàkenzà paÙvwà pa buloba awu. Nêmmanyè ne Wêwè udi umwèumwè awu makèèlèlè, leelù, too ne kashidi."

Twìnyikààyaaku mitù yètù mpindyewu.

<sup>137</sup> Mukalenga Yesù, nguumuka ku butangadiki nya ku mudimu  
wà cipròfetà, kàdi nànsa nànkú ndi nKwitabuuja, Mukalenge,  
Wéwè ngwàkacìlaya. Nènku ndi ndòmba bwà Wéwè kucìfila,  
dilòòlò edi. Enzàku nànkú. Nguumvwìlakù. Pùùmukà batèèleji  
aba mwaba ewu, dilòòlò edi, ne twêtù kwalukila kumbèlu,  
twàmbèku mwàkambà bávvà báfùmina ku Èmawùsè abu  
ne: "Myoyi yètù kayìvvakù yìlákuka kapyà munda mwètù  
pàvvà Ye wákula neetù mu njila apu anyì?" Yesù ùvwa  
mubiìshìibwe ku bafwé; bôbô kabàvwa bamanyè to. Uvwabò  
bààkula nendè awu ùvwa n'Yéyè; kabàvwa bacimanyè to. Kàdi  
pààkabwelà Ye naabò mu nzùbu amu, ne kukàngabò ciibi,  
dibà adi kwenza Ye cintu kampànda mùshindù wàkacyenzà Ye  
kumpàla kwà dipoopediibwa Dyèndè dyà pa nkùrusè amu. Aci  
kubàkàngulaci mèsu. Kumònabò ne ùvwa n'Yéyè. Cyàkàbìdì,  
Mukalenge, myoyi yètù yilakukèku kapyà patùdì twalukila  
kumbèlu dilòòlò edi apa, mwàkalàkukà yábò amu. Bwalu tudi  
bamanyè ne Wéwè udi mwakùle neetù mu njila. Enzàku bintu,  
dilòòlò edi, biWàkenzà paÙvwa pa buloba abi, bwalu Wéwè udi  
umwèumwè awu makèèlèlè, leelù, too ne kashidi. Tudi tulòmba  
mu Dínà dyà Yesù. Amen.

<sup>138</sup> Mpindyewu ikàalaayi mu disambila ne itàbùùjaayi ànu cyanàànà. Twanjààyi kudilàmbwila *elu* luseke, dyàmbedi. Nànscha wèwè usanganyiibwa penyi, mu citanda emu, itàbùùjà Nzambì. Ndi njingakù ne muntu yônsò ikalè mu kaneemu kàà menemene ne musòmbe mupùwe, ùsambilà.

<sup>139</sup> Eci kacyènakù mwà kwenzekaku to nànscha bishi. Mvwa ngaakula mu dìndà emu, ku didyà dyà bambi pa, “cidikà.” *Cidikà* cyà kabàyikù mwà kwitabuujaku to, n’“cintu kampànda cyà kabàyikù mwà kwitabuuja to, kàdi ciikàle cilelèlè.” S’nudi bamanyè ne Nyumà Mwîmpè mmufwànyìne kwimana apa ne kwamba cintu kampànda mu batèèleji amu, wàmbila bantu bândì ncìyi mumanyè to, s’bivwa bikèngela kwikalaci cidikà. Ncintu kampànda cidi kaciyi mwà kumvwijiibwa to. Ncyêna mumanyè ne Yéyè neacyénzè to. Ndi mutèkèmène ànu ne neÀcyénzè, ngeeyemena ne neÀcyénzè.

<sup>140</sup> Mpindyewu sambilà ànu cyanàànà, wamba ne: “Mukalenge Yesù, ndi muswè ndengèku civwàlù Cyèbè, ne mêmè ndi ndi ne dijinga. Ndi nKulaya, Mukalenge ne, né—nénKukwàcìlè mudimu matükù àànyì ônsò à mwoyi.” Nzambì mmuswè bwà wèwè kunyingalala. Pawikalà kùyi munyingàlàle to; nyingàlàlà, wàmbè ne: “Ndi muswè kunyingalala, Mukalenge. Ndi muswè bwà Wèwè kungondopa. Ndi muswè bwà Umbènèshèku. Ngondòpaanyì mpindyewu Mukalenge. Ndi musadidi Webè.”

<sup>141</sup> Nkaavwa... Nudi bààbanyè twartà twà disambila anyì? Nkàvwa ànu ne nkonkè Billy ní ûwwa... Yéyè kàyi ùcyènza to, ndi mufwànyìne kubìikila mulongo wà babèèdì. Kádi kabèènakù bààbanya twartà twà disambila leelù ewu to. Sòmbaayi ànu mu kaneemu, itàbùùjayi.

<sup>142</sup> Mpindyewu, mu Dînà dyà Yesù Kilistò, ndi nkàwàta nyumà yônsò ubi mwaba ewu ku bukòntonyi bwànyì mêmè, bwà butùmbì bwà Nzambì, bwà Dîyî Dyèndè dyàmona mwà kumanyishiibwa, bwà mu Ditùkù dyà Cilumbulwidi katwìkadikù ne kabingìlà nànscha kàmwè to.

<sup>143</sup> Mpindyewu tàngilà mu nùnku ewu, ne itàbùùjà mpindyewu. Sambilà ne mwoyi wèbè wônsò, ne sambilà ànu cyanàànà, ne didipwekesha dyônsò. KùCilwîshiku to. Dilekèlèlè ànu cyànanàànà, wàmbè ne: “Mukalenge, Wèwè ngudi mwenzè mulayì awu. Mêmè ndi nKwitabuuja.” Ki cindì ne cyà kwenza ncyôcì aci.

<sup>144</sup> Ndi mumanyè ne kabyèna bikèngela bwà nnùkonkè to. Mbanganyì bàkààdiku bamònè Bukénkè abu? Tumonààyìbi. Nukààdi bamònè fòtô waBù. Tùmonààyìbi byanza byènù, aba bàkaadiku bamònè fòtô waBù. Kanwènaayikù nuBùmònà mwaba wàwa mene anyì? Nwamònu’s, mmu cipaapu cikwàbò. Bùdi kumutù menemene kwà inàbànzà wàwa.

<sup>145</sup> Ùdi ne lutàtù Iwà ùsaama mikòlò ne nyimà. Yéyè... Udi witabuuja ne Nzambì ùdi mwà kukwondopa anyì, mwanèètù wa

bakàjì? Ciwàlèngì ncinyì? Kwêna mummanyè to, kàdi wâlengì Cintu kampànda's. Bu Mukalenge Yesù mwà kungambila ne wêwè udi nganyì, aci ncifwànyìnekù kukufikisha ku diitabuuja byà bitàmbè bwímpè anyì? Udi Mandàmù Phillips. Aci nî ncnyà bushùwà, juukilà kuulu. Èyo. Ndi mwenyi ànu wa menemene kûdì anyì? Elà cyanza muulu nî ncnyà bushùwà. Kacya bândela ncítukù mwânjì kumumònà to. Cyèlengìye aci ncinyì? Nukayiikilè ne mukàjì awu, paanyimà. Bisaamà abi mbiyè byônsò mwamwamwa patùdì twakulangana apa. Udi bîmpè. Udi mwà kwalukila kwèbè ne kwikala musàngàle.

<sup>146</sup> Ki inăbànzà nyéyè ewu, ànu paanyimà pèndè menemene apu. Ùdi ne disaamà dyà mpàla. Èyi Nzambì wa yaayà, yéyè kàyi... Dînà dyèndè m'Màndàmù Star. Itabùùjà, Yesù Kilistò neakusàngàjè. Juukilà kuulu witabuuje dyondopiibwa dyèbè. Mêmè mwikàle mwenyi kûdì, nyungìsha byanza byèbè. Disaamà dyèbè dyà mpàla adi dyàjiki. Yesù Kilistò wàkondòpù.

<sup>147</sup> Cyàkalayàye ncinyì? Yéyè ngwàkacìlaya. Nudi nwitatuuja anyì?

<sup>148</sup> Kûdi inăbànzà ànu lwà paanyimà pèndè apu, musòmbepù. Ùdi munkaci mwà kusambila. Ùdi ne mutù wùmunyìnguluka, mupetè ntàtù mikòdyàkànàngàne. Mmuswè kulekela mfwankà. Dînà dyèndè m'Màndàmù Bordon. Juukà kuulu, Mândàmù Bordon. Mfwanka yèbè ayi yàjikì. Yesù Kilistò ùdi ukusàngàja. Ncítukù mwânjì kumumònà bakàjì abu kacya bândela to.

<sup>149</sup> Nudi nwitatuuja anyì? Kadi's nudi bamanya ne mêmè kí ngudi mwà kwenza aci to. Awu n'Yesù Kilistò. Ncinyì aci? "Dîyì ndisàkisha, ne bukolè, kutàmba mwelè wà mvità wà nseke yìbìdì, dijinguludi dyà meeji ne mapàngadika a mu mwoyi." N'Dîyì, Yesù Kilistò umwèumwè awu makèèlèlè, leelù, too ne kashidi. Nwènù kanwènaku mwà kwitabuuja nànkú anyì?

<sup>150</sup> Tàngilààyi, muntu mulùme nyéyè ewu musòmbe lwà kaaba aka, mwikàle ne kààmundà, disaamà dyà mwoyi. Ncnyà bushùwà. Ncynéa mumanyè muntu mulùme ewu to. Ncítukù mwânjì kumumònà to. Kàdi mmwambi. Révérend, Mukalenge Kinsey. Ncnyà bushùwà. Udi witabuuja anyì, mukalenge? Juukilà kuulu wàkidile dyondopiibwa dyèbè. Yesù Kilistò ùdi ùkusàngaja.

<sup>151</sup> Wêwè mwinè, udikù mwà kungaanyishila anyi, bu mûdì mwambi? Tentékèla mukàjèebè byanza, yéyè ùdi ûsaama disaamà dyà twonyi, ne disaamà dyà mucìma, mwikàle ne bujitu bupitèpíté, ne ntàtù mikòdyàkàne. Mutentékèlè byanza. Nebìmuumùkè, wêwè mwitabùùje.

<sup>152</sup> Ambà tûng, kûdi muntu musòmbe ànu paanyimà pèèbè mene apu, mmubwikila kûdi mundidimbì wà lufù. Ùdi ne kànsérè. Muntu awu ùdi ûsaama cyûjà cyà kansérè, kansérè, ne dinyìnguluka dyà mutù. Dînà dyèndè m'Mukalenge Young. Itàbùùjaaku mpindyewu. Yesù Kilistò ùdi ùkusàngaja. Udi uciìtabuuja anyì? Ùdi uciìtabaa anyì? Èyo, mukalenge.

<sup>153</sup> Muntu mulùme nyewù mulààdika, mulààdika kaaba aka pa kalààlù kàà dibunya. Mukalenge, mêmè ncyêna mukumanyè to. Bu ne mvwa mwà kukwondopa, nùnku ndi mucyënzi. Mêmè ndi mwenyì kûdi. Nudi balwilè bônsò njila ewu. Udi muditâcîshe bwà kulwa mwab'ewu. Kwéna mwà kusokokakù cidi cikutâcisha to; kàdi mêmè ncyêna mwà kukwondopa to. Udi mulwè mûneemu ne mukàjèebè. Nyawù musòmbe mwab'awu muvvâle cinkooci cyà diikala dyà cimuma cyà pêche. Ncyà bushùwà. Èyo. Muntu awu mmubwikila kûdi mundidimbì wà lufù; ùdi mwà kwikala ne mwoyi ànu bwà katancì kakesè mpindyewu. Ùdi ne kansérè.

<sup>154</sup> Wêwè udi pèèbè usaama, mwanèètù wa bakàjì. Udi witabuuja ne Nzambi ùdi mwà kungambila cyûdì usaama anyì? Nyimà ngudi ukusaama. Ncyà bushùwà. Aci nî ncyà bushùwà, juukilà kuulu. Èyowà, wâpecì dyondopa dyèbè. Cítâbùùjè. Tentekèlè bàyeebè cyanza.

<sup>155</sup> Udi witabuuja ne mêmè ndi mupròfetà Wendè anyì, mukalenge? Wêwè mushààlè mulààle mwaba awu, s'neùfwé bushùwa. Kwena mwà kwikala ne mwoyi to. Kwàjikì. Bangàngàbukà mbakwèle làà. Kànsérè nkakukunyè. Mêmè ewu's nkààdikù mumònémône byà bitàmbe cyèbè aci byondòpiibwe. Mêmè ncyêna mwà kukwondopa to. Kàdi bu wêwè ànu mwà kuciitaba ne kuciitabuuja nàka's! Udi uciitabuuja anyì? Ki webè mpùngà wa ndekeelu nyéyé ewu. Bikondo byèbè byà ndekeelu mbidi munkaci mwà kupita ebi. Udi uciitabuuja anyì? Wêwè witabuuja, juukà mu kalààlù aku. Pàtukàmu mwimànyìne kuulu, mu Dînà dyà Yesù Kilistò! Imànyìnà kuulu ne ikàlà mwondòpiibwè, ne pàtukàmu wenda wendela kuulu, mwikàle utùmbisha Nzambi. Muntu kampànda àmukwâtèku ku cyanza mwaba awu, àmwambùlwishèku. Ki yéyè awu's, mwimànyìne kuulu.

<sup>156</sup> Mbanganyì mwab'ewu bàdì biìtabuujà? Elààyi byanza muulu. Juukilaayi kuulu. Nwénù bakwàbò bàdì baswè kwondopiibwa, juukààyi kuulu, mu Dînà dyà Yesù Kilistò. Elààyi byanza muulu, tumbishààyi Nzambi. Mupààyi luumù ne butumbi. Mpindyewu sàkidilà Mukalenge bwà dyondopiibwa dyèbè, Yesù Kilistò umwèumwè awu makèèlèlè, leelù, too ne kashidi!

<sup>157</sup> Mwanèètù wa balùme, bangàngàbukà's mbapangile. Ewu ki njila mulongolola wa Nzambi. Cítâbùùjè!

<sup>158</sup> Mbanganyì bàdì baswè kwitaba njila mulongolola wa Nzambi? Elààyi byanza muulu nùpe Nzambi luumù, yônsò wa kunùdì, ne nwìtabuujè ne nudi bondòpiibwe, mu Dînà dyà Yesù Kilistò. Amen.



*NJILA WÀ NZAMBI MULONGOLOLA BWÀ DITÙKÙ EDI* LUA64-0206E  
(God's Provided Way For This Day)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diinâyì dilòòlò, mu matùkù à6 à ngondo mwibidì, cidimu cyà 1964, ku Kern County Fairgrounds mu Bakersfield, mu Californie, U.S.A. Ndyumusha pa mukaba wa mêyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)